

Vaaru poia to Yesu Krisi tau Markus iboode Mak—Mark

*Neer rughuzaaŋa Yoan igharaat eez pa Yesu Krisi
(Mt 3:1-12; Lu 3:1-18; Yo 1:19-28)*

¹⁻² Ene vaaru poia to Yesu Krisi, i Maaron Naatu. Saveeŋa tau imuunŋ, ene vene: Uraat tooni iburig itaghon Maaron aliiŋa tau propet Isaia ivotia ve tiboode na. Isaav ighe:

“Ulooŋ. Yau pale nambaanŋ besooŋa tsiau ee imuunŋ payo.

I pale ivotia aliiŋag pa tamtamon ve igharaat eez payo. *

³ Neer ee iboboob izi nugh ŋginaaŋa ighe: ‘Agharaat eez pa Neer Tiina!

Apaduduŋai eez pani le iduduunŋ.’ ” *

⁴ Saveeŋ tane ighur anooŋa iza a to neer rughuzaaŋa Yoan. Pasaa, i ila ivot nugh ŋginaaŋa, ve ivovotia Maaron aliiŋa pa tamtamon ighe tipul ŋgar toozi sasaghati ileple, ve titoor ŋgar toozi imuul ila pa Maaron ve tigham yaa. Leso Maaron ireu sosor toozi. *

⁵ Eval tiina to taan sirivu to Yudea, yesŋa Yerusalem a tisov timeke tilala tooni izi yaa Yordan, ve tivovotia sosor toozi ila tooni, ve i irurughuuz zi ta sewe.

* **1:1-2:** Mal 3:1; Mt 11:10; Lu 7:27 * **1:3:** Is 57:14; Yo 1:23 * **1:4:** Mbanŋ 13:24, 19:4

⁶ Yoan inonogh ghi pa uuli tau tigharaata pa kamel ooro, ve ipuus ngaali pa puus tau tigharaata pa ngai uuli. *

Ve ighanghan siis, ve ighunghun tok suuru. *

⁷ I ivovotia saveen pa tamtamon tauvene ighe: “Neer ee aat ilam murei payau. I tapiri tiina. Iliiv ghau kat. Uraat sorok imin naput agheg pani ve napool waar to zuzuunja to aaghe, ene paam, yau poiag irau to naghama pani ne mako. *

⁸ Yau narughuuz gham pa yaa. Eemon i pale igham Avuvu Patabuyaana payam.” *

Yesu igham yaa

(Mt 3:13-17; Lu 3:21-22)

⁹ Saawe tana, Yesu ipul nugh Nasaret tau igheen taan sirivu to Galilaia, ve ilaagh ila ivot to Yoan izi yaa Yordan, ve Yoan irughuuz ta sewe.

¹⁰ Yesu ipul yaa ve iza, ve saawe duduun tana, maata izala le ighita sambam ikaak, ve Maaron Avuvu izilam imin mbuun, ve izala paavo.

¹¹ Ra saveen sambam ve izilam ighe: “Yau natug yo. Yau lolog igheen tsio, ve yo ugham ghau lolog poia kat.” *

Sadan itoov Yesu

(Mt 4:1-11; Lu 4:1-13)

¹² Yesu igham yaa le isov, ve rekia mon Maaron Avuvu ipaburiginini gha ipul yaa Yordan, ve ila ivot nugh nginaana.

* **1:6:** Yoan inonogh ghi imin muun propet Ilia inonogh ghi. Ngar tooni tane, ene imin ilaal pani ighe i pale igham uraat siriv imin Ilia. * **1:6:** 2King 1:8 * **1:7:** Mbanj 13:25 * **1:8:** Mbanj 2:4, 11:16 * **1:11:** Mbo 2:7; Is 42:1; Mt 12:18; Mk 9:7

13 I ileep ta sewe tomania gabua to su irau mbon tamoot ru. Saawe tana, Sadan itovtoova. Eemon yes anela tilepleep tomania ve tiuluule. † *

*Yesu ipaburigin uraat tooni izi Galilaia
(Mt 4:12-17; Lu 4:14-15)*

14 Yoan ighamgham uraat tooni, le tikisi ve tighuru ilonj ila ruum to yavyavuunj. Ra Yesu ila ivot taan sirivu to Galilaia muul, ve ipaburigin uraat tooni to votiaan vaaru poia to Maaron.

15 I isavsaav pa tamtamon ighe: “Aloonj! Saawe to Maaron itotoi pooz tooni ivot ighazoon, ene ilam igharau wa. Apul ngar tsiam sasaghati ileple, atoor ngar tsiam imuul ila pa Maaron, ve aghur ila vaaru poia!” *

*Yesu ipoi tamtamon paanj timin mbiwa tooni
(Mt 4:18-22; Lu 5:1-11)*

16 Saawe ee, Yesu ilaghlaagh taghon nari to yaa naliu Galilaia, ve ighita zeran ru to ghamuunj iigh tiwaswaas. Ee, eeza Simon, ve ite eeza Andreas. I Simon taazi.

17 Yesu isaav ila pazi ighe: “Ai, yamru alam ataghon ghau. Leso natotoi eez to ghamuunj tamtamon payam.”

18 Reikia mon yesuru tipul puugh toozi izi ileple, ve titaghon Yesu gha yesja tila.

19 Tilaghlaagh tila rig, ve Yesu ighita Zebedi natja ru, Yakobus ve Yoan, tilepleep izala waanj ve tiyaim puugh toozi.

† **1:13:** Yesu ileep izi nugh nginaanja ve Njeer Saghati itovtoova imin muun Adam ileep izi uum Eden ve Sadan itoova. Eemon Yesu itap ve igham ngar saghati eta mako. * **1:13:** Gnp 2:19-3:7; Mbo

91:11+; 1Kor 15:47 * **1:15:** Mt 3:2; Ga 4:4

²⁰ Yesu rekia mon isaav ila pazi ighe tilam titaghoni. Tauvene yesuru paam tipul tamazi tomania uraata tooni tileep izala waan, ve tila titaghon Yesu gha yesna tila.

Yesu iziir avuvu saghati pa neer ee

(Lu 4:31-37)

²¹ Yesu tomania mbiwa tooni tila tivot nugh Kapernaum, ve tileep ta sewe le umbom patabuyaan ivot. Ra Yesu ilon ila rumei toozi, ve ipaghazonai zi pa Maaron aliina.

²² Yes tiloon saveen tooni le tirur pa ngar tooni. Pasaa, i ipaduduun tamtamon imin zeran ngara siriv to tutuun mako. Saveen tooni, toman tapiri. Ve isavsav imin tamtamon tau i le eeza pa uraat tauvene. *

²³ Saawe tana, neer ee ilepleep tomani zi ila rumei loolo. I, avuvu saghati izeeva. Tauvene iboob aliina tiina ighe:

²⁴ “Aii, Yesu to Nasaret, ulam sene pasaa? Yei nimbaan payo? Ma ulam ughe uvaghamun ghei? Yau nawatagh ghom wa. Yo neer patabuyaan to Maaron.” *

²⁵ Eemon Yesu iyaoni ighe: “Ai, yo uneneen. Upuli ve ughau ula!”

²⁶ I isaav tauvene, ve avuvu saghati ivatoki neer tawe, iyak saghat, ve ipuli ve ila. *

²⁷ Yes tau tighita gabua ngereeta tana, tisov tirur pa Maaron tapiri, ve tivasavo zi tigde: “Wai, ene gabua mindai? Ene ngar paaghu ee. Neer tane, i le eeza ve tapiri. Aghita. Avuvu sasaghatizi paam

* **1:22:** Mt 7:28+ * **1:24:** Mt 8:29; Mk 15:39; Yems 2:19 * **1:26:** Mk 9:26

tileep ila i saamba. Pasaa, i isaav ariaan pazi, ve tilonloon aliinja gha tighaughau tila.”

²⁸ Puughu tane ta Yesu vaaru ilaan rekia mon le irau taan sirivu to Galilaia.

*Yesu igharaat moroghoon to Petrus rauliva
(Mt 8:14-15; Lu 4:38-39)*

²⁹⁻³⁰ Yesu ipul rumei tana, ve yesna Yakobus gha Yoan malmalizi tila pa Petrus yesuru Andreas ruum toozi. Tilon tila ruum loolo, ve tipaes pa Yesu tigde Simon rauliva imoroon le tiini iyes gha ighengheen we.

³¹ Tauvene Yesu ila ikis olman tinazi niima, ve iiti iburig, le moroghoon tooni isov. Ra olman tinazi ila igharaat lezi aniin.

*Yesu igharaat moroghoon katini
(Mt 8:16-17; Lu 4:40-41)*

³² Tilepleep le ravrav izi gha aaz izila, ra tamtamon tiyauur zetazna tisov tau timoroon, ma avuvu sasaghati tizeev zi na tila to Yesu, leso iuul zi.

³³ Nugh tawe tamtamona tisov tila tirou izi ruum tau Yesu ileep pani na naagho.

³⁴ Yesu igharaat tamtamon katini pa moroghoon toozi maata maata, ve iziir avuvu sasaghati naol pazi paam. Avuvu sasaghati tawe tiwataghi wa. Tauvene i ingalsekin zi ighe tisavia saveen eta sov. *

*Yesu igham uraat izi nugh siriv to Galilaia
(Lu 4:42-44)*

* **1:34:** Mk 1:24, 3:11+

³⁵ Mbonoozo, ndoroome geeg, ve Yesu iburig gha ipul ruum, ve ilaagh ila pa nugh nginaanja ee. Ra zigani ileep ta sewe ve isun. *

³⁶ Eemon Simon tomania zeetja siriv tila tiilo.

³⁷ Tila tindeenja, ve tipaes pani tigde: “Eval tiina tiliil ghom we!”

³⁸ Yesu iyol aliñazi ighe: “Tit aat tala pa nugh siriv tau tatangan ne. Leso navotia saveen pazi paam. Pasaa, yau nalam pa uraat tane.”

³⁹ Tauta Yesu ilaagh irau nugh nugh to Galilaia, ve ivovotia Maaron aliñja ilonj ila rumei toozi, ve izirziir avuvu sasaghati gha tighaughau pa tamtamon.

Yesu igharaat ñeer ee tau mbotmboot kolekole ighamu

(Mt 8:1-4; Lu 5:12-16)

⁴⁰ Ñeer ee, kolekole ighamu. ‡

I injarui Yesu ila, iput aaghe izi naagho, ve itan raraini ighe: “Isaav ighe lolom pa uleñ ghau, yo irau ugharaat ghau tinig poia ve ugham ghau nangalaan ila Maaron maata.”

⁴¹ Yesu loolo isaghatini, tauvene niima ila ikisi, ve isaav pani ighe: “Poia, yau aat nauul ghom. Aiyo, tinim poia ve ungalaañ!”

⁴² I isaav tauvene, ve rekia mon kolekole ighau pa ñeer tana le tiini poia.

⁴³⁻⁴⁴ Ra Yesu imbaanjo ila ve isaav ariaan pani ighe: “Uloonj. Aazne, tinim poia wa. Eemon

* **1:35:** Mbo 5:3; Mt 14:23; Mk 6:46 ‡ **1:40:** Isaav ighe kolekole igham tamtamon eta, ene patanjani tiina kat. Moroghoonj tooni ipoona pa zeetja ve Maaron paam. I irau igharau tamtamon eta mako, ve irau ilonj ila Rumei Tiina pa sunjuunj mako.

usavia gabua tane vaaru pa tamtamon eta sov. Malmalim ula, ve utotoi taum pa ñeer eta to watoonrau, ve ugham watoonrau pa Maaron itaghton tutuun tau Mose isavia na. Leso upaghazonai taum pa tamtamon, ve tiwatagh tigde tinim poia ve ungalaañ ila Maaron maata wa.” *

⁴⁵ Eemon ñeer tana itaghton Yesu aliinja mako. I ila ve ipaesia gabua tau ivot pani na vaaru pa eval tiina. Tauvene Yesu irau ilaagh ila tamtamon matazi muul mako, ve ilon ila nugh eta mako. Ziganani ilepleep izi nugh nginaanja. Eemon tamtamon to nugh nugh tilala tooni.

2

*Yesu igharaat ñeer narape ee ve ireu sosor tooni
(Mt 9:1-8; Lu 5:17-26)*

¹ Mbon siriv ilam ila, ra Yesu imuul ila pa Kapernaum, nugh tau i ilepleep pani na. Tamtamon tiloon Yesu vaaru tigde i imuul ila ileep izi ruum tooni,

²⁻³ tauvene eval tiina tila ve tipavon ruum le ivon kat. Ataman puughu paam, tipoon le sooso mako. Yesu ivovotia Maaron aliinja pazi, ve zeran paan tibaad ñeer narape ee tilam tigde Yesu iuule. Ñeer tawe, aaghe imaat. Irau ilaagh mako.

⁴ Zeran paan tana titoova to tilon tila tigharau Yesu. Eemon tirao mako. Pasaa, eval tiina tipoon zi. Tauvene tigham narape tana, ve titaghton ndeet tizala pa ruum paavo. Ra tipas atov siriv ighau, ve titughu tomania moogh tau i igheen izala na injarui Yesu izila, le igheen izi naagho.

* **1:43-44:** Wkp 14:1+

⁵ Yesu ighita zeran tana ghuruunḡ ila toozi iyaryaḡ kat. Tauvene isaav pa narape tana ighē: “Tazig, sosor tsio, yau nareua wa.” *

⁶ Zeran ḡgara siriv to tutuunḡ tileep tomani zi ta sewe paam. Yes tiloonḡ Yesu aliḡḡa ziiri rig tane, ve tigham ḡgar naol ila lolozig tige:

⁷ “Wai, puughu mindai ta ḡeer tane isaav tauvene? I ivelegh Maaron! Tamtamon eta irau ireu sosor mako. Maaron mon, o ireu sosor.” *

⁸ Yesu rekia mon ighilaal ḡgar toozi ila loolo. Tauvene ighason zi ighē: “Puughu mindai ta yam agham ḡgar naol ila lolomim?”

⁹ Saa saveeḡ ta raurauai payau to nasavia, lesu yam aghur ila? Nasaav pa narape tane naghe: ‘Sosor tsio, yau nareua wa’, ma naghe: ‘Yo uburig, ugham moogh tsio, ve ulaagh?’

¹⁰ Eemon yau naghe yam awatagh kat tauvene: Tamtamon Naatu, i eeza pa rewaanḡ sosor to tamtamon izi taan.” Ra isaav pa narape tana ighē:

¹¹ “Yau nasaav payo: Uburig, ugham moogh tsio, ve umuul ula pa ruum.” *

¹² I isaav tauvene, ve eval tiina tawe tisov timarar narape tana, ve rekia mon i iburig iyooz, igham moogh tooni, ve ivot gha ila. Yes tighita gabua ḡgereeta tana, ve tisov tirur pa Maaron tapiri, ve tipait eeza pa tapiri ve poia tooni tige: “Wai, ta muunḡ ve ilam, iit taghita gabua tauvene pai eta soone.” *

*Yesu ipoi Levi imin mbiwa tooni
(Mt 9:9-13; Lu 5:27-32)*

* **2:5:** Lu 7:48 * **2:7:** Mbo 32:5; Is 43:25; 1Yo 1:9 * **2:11:** Yo 5:8;
Mbanḡ 3:6 * **2:12:** Mt 9:33

¹³ Yesu ipul nugh tawe, ve indari izila nari to yaa Galilaia muul. Eval tiina tila tooni, ve i ipagha-zonjai zi pa Maaron aliinja.

¹⁴ Ra ilaagh muul ila, le ighita njeer ee to yaun takes ilepleep ila niia to uraat, eeza Levi. I Alpeus naatu. Yesu isaav pani ighe: “Yo ulam utaghon ghau.” Tauvene Levi iburig, ve itaghone gha yesuru tila.

¹⁵ Murei ra, Levi igham ghanghaniin izi ruum tooni. Yesu tomania mbiwa tooni tila tileep tomani zi, ve yesna tilup zi pa ghanghaniin. Saawe tana, Levi zeetna katini to yaun takes, tomania tamtamon naol to ghamuun sosor tilam paam ve yesna tilup zi pa ghanghaniin. Pasaa, tamtamon tauvene, katini titaghon Yesu.

¹⁶ Zeran tutuuna siriv tau lezi ngar tintiina pa tutuun na, tighita Yesu tomania zeran to ghamuun sosor ve yes to yaun takes tilup zi pa ghanghaniin, ve tighason mbiwa to Yesu tigue: “Wai, mindai ta tiina tsiam yesna zeran to yaun takes ve yes to ghamuun sosor tilup zi pa ghanghaniin?” *

¹⁷ Yesu iloon saveen toozi, ve isaav pazi ighe: “Yes tau tinizi poia na, dokta le uraat pazi mako. Yes moroghoona mon, o i le uraat pazi. Yau tauvene paam. Nalam pa poin tamtamon dudunazi mako. Nalam to napoi yes to ghamuun sosor.”

*Ghasoniin pa ngar to ngunuun tauun pa ghaniin
aniin*

(Mt 9:14-15; Lu 5:33-35)

¹⁸ Njeer rughuzaana Yoan zijeera ve zeran tu-tuuna zijeerazi, saawe naol tingun tauzi pa ghaniin

* **2:16:** Mt 11:19; Lu 15:1+

aniinŋ itaghon sunjuunŋ ngara. Tauvene saawe ee, zeran siriv tinjarui Yesu tila, ve tighasoni tigde: “Yoan zinjera ve zeran tutuunja zinjerazi, saawe naol, tinŋun tauzi pa ghaniinŋ aniinŋ. Pu-ughu mindai ta mbiwa tsio titaghon ngar tauvene mako?”

¹⁹ Yesu iyol ghasoniinŋ toozi tauvene: “Isaav ighe njeer eta ivai paaghu ve yesŋa zeetŋa tilup zi pa ghanghaniinŋ to vaiŋ tooni, pale zeetŋa loloji ipatanan ve tinŋun tauzi pa ghaniinŋ aniinŋ? Mako. Pa etazi ite tau ivai paaghu na ilepleep tomani zi.

²⁰ Eemon murei, saawe eta pale ivot, o tikis vaiŋ paaghu tana, ve tighamu ipul zeetŋa gha ila. Saawe tana, zeetŋa pale loloji ipatanan, ve tinŋun tauzi pa ghaniinŋ aniinŋ.”

Eez munŋaana to sunjuunŋ irau ilup tomania eez paaghu to Yesu mako

(Mt 9:16-17; Lu 5:36-39)

²¹ Yesu isavia saveeŋ palelaanŋ ite ighe: “Uuli munŋaana tau perekia na, ene irau tisai uuli paaghu rigta izala paavo to ipoona ne mako. Pasaa, uuli paaghu tawe pale ighoghoov uuli munŋaana tana, mako ivaputu ghi le isaghat kat.

²² Vaen tauvene paam. Irau tilinŋ vaen paaghu izila paatu munŋaana tau tigharaata pa mekmek uuli ne mako. Pasaa, vaen paaghu pale ipasaria paatu munŋaana le dinja ve perekia. Mako vaen imalinŋ, ve paatu paam isaghat. Tauvene vaen paaghu izila patuzi paghpaaghu, o poia.” *

Tamtamon Naatu inŋin umbom patabuyaan

(Mt 12:1-8; Lu 6:1-5)

* **2:22:** Mbanŋ 15:1-29; Ro 10:4; Hib 8:13

²³ Umbom patabuyaany ee, Yesu tomania mbiwa tooni tilaghlaagh ila uum to wit lolozi, ve mbiwa tooni tingoor wit anoonja siriv gha tighan. *

²⁴ Tauvene zeran tutuunja siriv tau tileep tigharau zi na, tighason Yesu tigde: “Ughita! Pu-ughu mindai ta mbiwa tsio tigham ngar tana? Aazne, ene saawe to uraat mako. Ene umbom patabuyaany to Maaron. Ngar tau tighamu ne, ene isapir pa tutuun to umbom patabuyaany.” *

²⁵⁻²⁶ Yesu isaav pazi ighe: “Sinainj tau isavia saawe tau kinik David yesnja zeetnja siriv timbool pa aninj ve pitool zi na, yam awaato rigta, ma mako? Sinainj tana isaav tauvene: Saawe tau Abiata i daaba to watoonrau, David ilonj ila balbaal patabuyaany to Maaron, ve igham mberet patabuyaany tau tighuru ila Maaron naagho na. Mberet tawe le ngalsekiinja tauvene: Tamtamon sorok irau tighani mako. Yes zeran to watoonrau mon, o tighani. Eemon David igham mberet tana gha ighani, ve irei sirivu pa ziņeera gha tighan paam.” *

²⁷ Ra Yesu iparwai saveen tooni ighe: “Maaron ighur umbom patabuyaany to iuul tamtamon. Ighur tamtamon to timin besoonja pa umbom patabuyaany mako. *

²⁸ Tauvene Tamtamon Naatu, i Tiina tau injin umbom patabuyaany.” *

3

* **2:23:** Lo 23:25 * **2:24:** Igham 20:10, 34:21 * **2:25-26:** Wkp 24:5+; 1Sam 21:4+ * **2:27:** Igham 23:12 * **2:28:** Kol 2:16-17

Yesu igharaat ñeer ee tau niima imaat
(Mt 12:9-14; Lu 6:6-11)

¹ Tileep le umbom patabuyaaj ite ivot, ra Yesu ilonj ila rumei ee. Ve ñeer ee ilepleep tomani zi. I niima ee imaat.

² Zeran tutuunja siriv tilepleep tomani zi paam. Yes tigde tipayooz Yesu pa savsaveej. Tauvene timarari tigde tighita: Pale igharaat moroghoonja eta ila saawe to umbom patabuyaaj, ma mako?

³ Yesu isaav pa ñeer tau niima imaat na ighe: “Ulam uyooz izi sene.”

⁴ Ra ighason zeran tutuunja tawe ighe: “Laak, ñgar sindei tau yam aghita aghe iduduun pa tutuun to Maaron? Tauul tamtamon ve tagham poghani zi pa saawe to umbom patabuyaaj, ma tagham saghatin zi? Tagham mulin zi pa patanjani toozi, ma tarav zi timaat?” Yesu isavia saveej tane le tineneej mon. Irau tiyol saveej tooni mako. *

⁵ Tauvene Yesu maata ila pazi toman aatyavyav. Pasaa, ñgar toozi iyaryaan kat, ve lolozi isaghatin ñeer tana rigta mako. Eemon loolo ipatanjan pazi paam. Ra isaav pa ñeer tau niima isaghat na ighe: “Uyoot nimam iduduun.” Tauvene ñeer tana iyoot niima le niima poia muul.

⁶ Tauta zeran tutuunja tau tileep tomani zi na, tiburig tivot tila muuri, ve yesnja zeran siriv tau tipakpaak Erod pa ñgar tooni na, tilup zi ve tiil eez pa ravuun Yesu imaat. *

Eval tiina titaghon Yesu
(Mt 4:24-25, 12:15-16; Lu 6:17-19)

* 3:4: Lu 14:3 * 3:6: Mt 22:15+; Yo 5:16

⁷⁻⁸ Yesu tomania mbiwa tooni tipul nugh tawe, ve tizila muul pa yaa naliu Galilaia. Ve eval tiina kat to Galilaia titaghon zi gha yesja tila. Ve yes mon mako. Tamtamon katini to Yudea, Yerusalem, ve Idumea, tomania tamtamon naol to nugh siriv tau tighen ila pa yaa Yordan ziige ite na tila tomani zi. Ve taan sirivu to nugh Tiro ve Sidon tamtamona paam, tiloon Yesu vaaru pa gabua naol tau i ighamgham zi na, tauvene tisov tila tigde tighita.

⁹ Eval tiina tila tilivutin Yesu. Tauvene i isaav pa mbiwa tooni ighe tigham waan eta ilam isaan pan. Ige tamtamon tigiiri, o iza waan ve ila ipot soghan.

¹⁰ Pasaa, Yesu igharaat moroghoon katini gha tinizi poia wa. Tauvene tamtamon tisov tau timoroon na, tivagiri zi tigde le titutu rigta.

¹¹ Ve yes tau avuvu sasaghati tizeev zi na, saawe isov tau tighita Yesu, titaptap tizi Yesu aaghe puughu, ve tiboboo alinazi tiina tigde: “Yo Maaron Naatu!” *

¹² Eemon Yesu iyaon zi, ve ingalsekin zi ariaan ighe tivotia eeza ighazoon sov.

Yesu ighur tamtamon sanjavul ve ru timin mbanjoona tooni

(Mt 10:1-4; Lu 6:12-16)

¹³ Murei ra, Yesu izala pa loloz ee, ve ipoi tamtamon siriv tau i loolo pazi na, tilam tooni.

¹⁴⁻¹⁵ Ve ighur tamtamon sanjavul ve ru timin mbiwa tooni. Leso tileep tomania, ve murei pale imbaan zi tila pa votiaan vaaru poia. Ve irei tapiri

* **3:11:** Mk 1:24, 34; Lu 4:41; Mban 19:15

irau zi, ve ighur avuvu sasaghati tisov tileep ila sambazi. Leso tiziir zi tighau.

¹⁶ Zeran saṇavul ve ru tawe, ezazi tauvene: Simon (i, Yesu iwaat eeza ite ighu Petrus),

¹⁷ ve Zebedi natṇa ru, Yakobus gha taazi Yoan. (Zeran ru tane, Yesu iwaat zi ighu ‘Boanerges.’ Ezazi tane, puughu tauvene: ‘Lalaav natṇa.’) *

¹⁸ Ve Andreas, Pilip, Patoromai, Matayu, Tomas, Yakobus ite tau Alpai naatu na, Tadeus, Simon ite tau iyooz tomania yes Selot, *

¹⁹ ve Yudas Iskariot tau murei ighur Yesu ila koiṇa nimazi.

Yesu koiṇa tighu i igham uraat toman Sadan tapiri

(Mt 12:22-32; Lu 11:14-23, 12:10)

²⁰ Yesu tomania mbiwa tooni timuul tila pa ruum, ve eval tiina tilam tilivut zi muul. Tauvene lezi saawe eta to ghaniin mako. *

²¹ Yesu ziiri waaro tooni siriv tiloon vaaru pa gabua naol tau i ighamgham zi na, ve tila tighu tikisi ve tighamu tila. Pasaa, tighu i daaba ikaukau. *

²² Zeran ṅgara siriv to tutuun tileep Yerusalem tilam, ve tṅgal saveen pani tighu: “Aa, ewe Belsebul tau daaba to avuvu sasaghati na izeeva ve ipaloti. Tauta i le tapiri to iziir avuvu sasaghati tighau.” *

²³ Tauvene Yesu ipoi zi tilam, ve isavia saveen palelaan tane pazi ighu: “Mindai, pale Sadan ighur koi pa tauu zeetṇa ve iziir zi tighau? Mako.

* **3:17:** Lu 9:54 * **3:18:** Selot, ene lupuun ee to yes Yuda tau tighu tiziir gavman to Rom tighau. * **3:20:** Mk 6:31 * **3:21:** Yo 7:5, 10:20 * **3:22:** Mt 9:34

²⁴ Isaav ighe kinik eta tomania tamtamon tooni tivaghuru koi pa tauzi ve tivalagh zi tileep lez lez, ene irau tiyooz ariaañ mako.

²⁵ Ve ruum paam. Isaav ighe tamtamona tivaghuru koi pa tauzi ve tivalagh zi tileep lez lez, ene irau tiyooz ariaañ mako.

²⁶ Sadan tauvene paam. Isaav ighe iburig ve igham malmal pa tauu zeetņa, ma tamtamon tooni tivaghuru koi pa tauzi, ene irau iyooz ariaañ muul mako. Tapiri ighe isov.

²⁷ “Tamtamon eta irau ireu ruum to ñeer ariaañ eta, ve ilonj ila iyau sorokin gabua tooni ne mako. I aat itatan ñeer ariaañ tana tapiri ve ikauu pa ravraav le isov, o iyauur gabua naol isov tau tighen ilonj ila ruum tooni loolo. *

²⁸ Onoon kat yau nasaav payam: Sosor isov to tamtamon, ve saveeñ sasaghati naol isov tau tisiki pa Maaron, ene Maaron irau ireua pazi.

²⁹ Eemon isaav ighe tamtamon eta isik saveeñ saghati inarui Avuvu Patabuyaañ tomania uraat tooni, ene sosor tauvene, Maaron irau ireua mako. Pale ighen taghon taghon gha ila.” *

³⁰ Yesu isavia saveeñ naol tana pazi pasaa, yes tighen avuvu saghati izeeva.

Yesu tiina ve tazņa

(Mt 12:46-50; Lu 8:19-21)

³¹ Saawe tana, Yesu tiina tomania tazņa tilam tivot. Yes tiyooz muuri, ve timbaañ pa Yesu tighen ivot ila toozi.

* **3:27:** Kol 2:15; 1Yo 3:8, 4:4; Syg 20:2

* **3:29:** Mt 12:31+; Lu 12:10; Hib 10:26+

³² Saawe tana, eval tiina tirou livutin Yesu. Yes tisaav pani tighe: “Ou, tinam tomania tazimṅa tilam tiyozyooz muuri we. Tighe tighit ghom.”

³³ Yesu iyol aliṅazi ighe: “Tinaṅ sei, ve tazigṅa savunugha?”

³⁴ Ra maata ila pa eval tiina tau tilivuti na, ve isaav pazi ighe: “Ene yau tinaṅṅa ve tazigṅa.

³⁵ Pa sei tau ighe itaghon Maaron loolo, ene imin yau tazig, livug, ve tinaṅ.” *

4

Saveeṅ palelaaṅ to suruvaanṅ uuv

(Mt 13:1-9; Lu 8:4-8)

¹ Yesu ila ivot yaa naliu ziige, ve ipaburigin uraat tooni muul to paduduṅṅaṅ tamtamon pa Maaron aliṅṅa. Saawe tana, eval tiina kat tila tilivuti tigde tilooṅ saveeṅ tooni. Tauvene i izaa waan ee, ve tiparuuze ivot ila rig pa nari. Ra mboole izi, ve ivotia Maaron aliṅṅa pazi. Eval tiina tawe tileep izi nari ve tighurghur taliṅazi pa saveeṅ tooni.

² Yesu ipaghazonṅai zi pa gabua naol ila saveeṅ palelaaṅ. I isaav pazi ighe:

³ “Alooṅ. Pai ee, ṅeer ee igham wit uuve, ve ila uum tooni ighe isuruuv zi.

⁴ Saawe tau isusuruuv uuv tawe, siriv timburur tizi eez. Tauvene man tiroov tila ve tighan suvinia.

⁵ Ve siriv timburur izi nugh tau mbonṅar tiina igheen siṅṅa, ve taan ṅgiira mon igheen izala paavo. Tauvene rekia mon titum tizaa.

* **3:35:** Yo 15:14; Ro 8:29; Hib 2:11+

⁶ Eemon saawe tau aaz ighaaz ve taan ituntun, wit tawe rauazi timalai ve timatmaat. Pasaa, wariazi tizila geeg mako.

⁷ Ve uuv siriv timburur ila waar tuatua loloji. Tauvene waar tawe titum tomania wit tizaa, ve tinduruv zi le anoŋazi mako.

⁸ “Eemon uuv siriv titap tizala taan poia. Tauvene tipaar tizaa le titum poi, ve anoŋazi katini. Siriv anoŋazi irau tamoot ee saŋavul (30), siriv anoŋazi irau tamoot tol (60), ve siriv anoŋazi irau ndiŋndiŋ ee (100).”

⁹ Yesu isavia saveeŋ palelaaŋ tane le isov, ra ipariaaŋa ighe: “Tamtamon tau ighe le taliŋa, i aat iloŋ saveeŋ tane, ve igham ŋgar pani poi!”

*Puughu tau Yesu isavsaav ila saveeŋ palelaaŋ
(Mt 13:10-17; Lu 8:9-10)*

¹⁰ Eval tiina tana tipul zi ve tila, ve murei ra, Yesu tomania mbiwa tooni saŋavul ve ru ve zeran siriv, yes mon tileep. Yes tighasoni pa saveeŋ palelaaŋ tooni puughu,

¹¹ ve Yesu isaav pazi ighe: “Pooz to Maaron, ene ŋgara yonŋaŋa. Eemon yam, Maaron igham poghani gham, ve ipaghazoŋai ŋgar tana payam. Ve yes tau tileep ila pooz tooni loolo mako na, tiloŋloŋ mos ila saveeŋ palelaaŋ mon. [Pasaa, loloji ivool wa.]

¹² Tauta aat matazi tighitghita gabua, eemon irau tighilaal puughu mako.

Ve taliŋazi tiloŋloŋ saveeŋ, eemon irau tigham ŋgar pani mako.

Ve imin ta tighilaal gabua puughu ve tigham
 ngar pani, kanan titoor ngar toozi, ve
 Maaron ireu sosor toozi.” *

Saveen palelaan to suruvaan uuv puughu
(Mt 13:18-23; Lu 8:11-15)

¹³ Yesu isaav pazi muul: “Isaav ighe aghazoon
 pa saveen palelaan tane puughu mako, ene pale
 awatagh saveen palelaan siriv pughuzi mindai?”

¹⁴ Wit uuve tau njeer tana isuruuv zi, ene iza to
 Maaron saveen tooni. *

¹⁵ “Uuv siriv tau timburur tizi eez, ene iza to
 tamtamon tau tiloon Maaron aliina, eemon rekia
 mon Sadan ila ve isan saveen tawe ighau pa lolozi.

¹⁶ “Ve uuv siriv tau timburur izi nugh tau
 mbonar tiina igheen siina, ve taan ngiira mon
 igheen izala paavo, ene iza to tamtamon tau
 tiloon Maaron aliina, ve rekia mon tighamu toman
 lolozi poia kat.

¹⁷ Eemon saveen tawe igheen tunja ila lolozi
 mako. Yes timin anin tau waria izila kat taan
 loolo mako. Tauvene tiyooz tunja mako. Isaav
 ighe tamtamon tigham saghatin zi, ma patanani
 ite paam ivot pazi pasaa, titaghon Maaron aliina,
 ene rekia mon ve tipul ghuruun ila toozi, ve tighur
 murizi pa Maaron.

¹⁸ “Ve uuv siriv tau timburur ila waar tuatua
 lolozi, ene iza to tamtamon tau tiloon saveen to
 Maaron.

¹⁹ Eemon patanani naol to taan, tomania kuaz
 ve gabua popoia siriv tau tamtamon lolozi ighaar
 pani na, ene ikau ngar toozi. Tauvene saveen tau

* **4:12:** Is 6:9+; Yo 12:40; Mbanj 28:26+; Ro 11:8 * **4:14:** 1Pe 1:23

igheen ila lolozi na, ighur anoonja poia eta ivot mako. *

²⁰ “Ve uuv siriv tau neer tana isuruuv zi ila taan poia, ene iza a to yes tau tiloon saveen to Maaron, ve tighamu toman lolozi poia. Tauvene ghuruun ila toozi ighur anoonja popoia katini. Siriv, anonjazi ivot irau tamoot ee sanjavul (30), siriv, anonjazi irau tamoot tol (60), ve siriv anonjazi irau ndinndin ee (100).” *

*Saveen palelaan to lam
(Lu 8:16-18)*

²¹ Yesu isaav pazi muul ighu: “Laak, isaav ighu tamtamon tigham lam eta ilam, pale tipagudu pa oon, ma tighuru ila boor saamba? Mako. Pale tisaroni iza ituuk. *

²² Tauvene gabua eta irau iyoon mako. Gabua isov tau ngozaan, ene pale tipaghazonjai zi leso tighu ghazonja. Ve ngar isov tau yongan, ene pale tivot mataghare. *

²³ Tamtamon tau ighu le taliina, i aat iloon saveen tane ve igham ngar pani poi.”

²⁴ Ra Yesu isaav pazi muul ighu: “Aghur talinamim pa saveen tau alonloonja ne, ve agham ngar pani poi. Pa saa ngar tau ighu yam agham pa saveen tane, ene aat Maaron igham payam paam. Isaav ighu azuari gham to agham ngar pani poi ve ataghoni, ene pale Maaron iuul gham ve igham lemim ngar siriv paam. *

* **4:19:** Mt 19:23+; Lu 12:15; 1Tim 6:9, 17; 1Yo 2:15+ * **4:20:**

Yems 1:25 * **4:21:** Mt 5:15; Lu 11:33 * **4:22:** Mt 10:26; Lu 12:2

* **4:24:** Mt 7:2; Lu 6:38

²⁵ Pa ighe tamtamon eta iwatagh Maaron aliija ve itaghoni, ene pale Maaron iseen ngar tooni pa ngar siriv muul. Eemon isaav ighe tamtamon eta iwatagh Maaron aliija rigta ve itaghoni mako, ene pale Maaron iwalaav ngar tooni rigmon tana pani, ve ileep sorok.” *

Saveen palelaan to aniiñ uuve tau itum izaa

²⁶ Yesu isaav pazi muul ighe: “Pooz to Maaron ngara, ene imin neer ee tau igham wit uuve, ve ila isuruuv zi ila uum, ve isasañan.

²⁷⁻²⁸ Mboñ mataaz, i ighengheen, ve iburig ila ighamgham uraat tooni siriv. Eez to wit itum izaa pani, ene i iwataghi mako. Taan tauu, ta igham wit tawe itum. Tauvene parazi tiging pa taan imin maata, ra rauazi tivot, ve tighur anonjazi. *

²⁹ Saawe tau wit imatuugh, neer tana rekia mon ila toman mbuzaagh, ve irav motmotin zi. Pasaa, saawe to mariri, tauta ivot wa.” *

*Saveen palelaan to mastet uuve
(Mt 13:31-32; Lu 13:18-19)*

³⁰ Yesu isaav muul ighe: “Pooz to Maaron, ene ngara mindai? Pale tasavia izaa to saa?

³¹ Ene imin mastet uuve. Mastet uuve, ene geegeu kat. *

Gabua isov to taan uvezi tintiina tiliivo.

³² Eemon isaav ighe tasuruuv mastet uuve ila taan, ene pale itum izaa tiina ve ghitoonja imin ai. Iliiv sain isov to uum. Ve ighur booga tintiina paam. Tauvene man tau tirovroov ila taitai

* **4:25:** Mt 13:12, 25:29; Lu 19:26 * **4:27-28:** Yems 5:7 * **4:29:**

Syg 14:15+ * **4:31:** Mastet uuve, ene geegeu kat imin dog paatu ma mbuas uuve.

saamba na, yes irau tirau rumazi izala booga, lesa tiyoon ila yavyaav.” *

³³ Yesu ivotia Maaron aliina pa tamtamon ila saveen palelaan katini tauvene. Lesa irauraua pazi to tiloona ve tigham ngar pani.

³⁴ Tauvene saawe isov tau i ivotia mos pa eval tiina, isavsaav ila saveen palelaan mon. Eemon saawe tau yesna mbiwa tooni mon tileep, i ipaghazonai saveen isov puughu lesa ighazon pazi.

*Yesu isaav, ve yaghur ve dibom imaat
(Mt 8:23-27; Lu 8:22-25)*

³⁵ Aaz eemon tana, Yesu tomania mbiwa tooni tilepleep le ravrav izi, ra i isaav pazi ighe: “Aiyo, tala tavool pa yaa naliu ziige ite.”

³⁶ Tauvene tipul eval tiina tileep, ve mbiwa tooni tizaa waan tau Yesu ileep izala na, ve tivot tila. Waan siriv tila tomani zi paam.

³⁷⁻³⁸ Yesu izi igheen ta waan mboole we, ve iwat daaba pa ali, ve igheen le loolo iveegh kat. Malau mako ve yaghur tiina kat izaa, le ipei dibom tintiina. Ereman ilon ila waan loolo, ve rigmon kanan timarum. Tauvene mbiwa tooni tivaano, ve tisaav pani tigde: “Padudunaan, uburig lak! Paita tamarum gha talaleen tane! Yo ugham ngar pait, ma mako?”

³⁹ Yesu iburig gha isaav ariiaan pa yaghur imin yaoninini. Ra isaav pa dibom ighe: “Ai, irao! Atem izi!” Reikia mon yaghur imaat, ve taun tiina izi.

⁴⁰ Ra Yesu isaav pa mbiwa tooni ighe: “Yam aroi pasaa? Aghur ila soone?”

* **4:32:** Mt 24:14

41 Mbiwa tooni tighita gabua ngereeta tana, le roinj tiina kat igham zi. Ve tivasavo zi tighe: “Wai, ñeer tane sei kat, ta yaghur ve dibom paam tiloon aliina ve titaghoni ne?” *

5

Yesu iziir avuvu sasaghati katini pa ñeer ee izi nugh Gerasa

(Mt 8:28-34; Lu 8:26-39)

¹ Yesu tomania mbiwa tooni tiraav tila tiloon nari to yes Gerasa tau igheen ila yaa naliu Galilaia ziige ite.

²⁻⁴ Nugh tawe, ñeer ee ilepleep. I, avuvu sasaghati katini tizeeva, ve monmon ilepleep ilonj ila maet puura siriv tau tigharaat zi timin naal pa mateegha. Saawe tau Yesu iyaat izi pa waan, ñeer tawe ipul niia ta maet puura we, ve ilaagh ñaruini ila. Ñeer tana, saawe naol, tikauu pa ravraav toman sen. Eemon ikupkuup motmotin zi, ve ighaughau ila. Pasaa, i tapiri tiina kat. Tauvene tamtamon eta irau ikisi ve ikauu muul mako. Ve tamtamon eta irau ighamu aate izi ne mako.

⁵ Mbonj mataaz, ivalaghlaagh taghon loloz, ve ilonjonj ila maet puura siriv tau tigharaat zi timin naal. Ve saawe isov, iboboob sorok, ve ighoghorot tauu pa maet tau lezi matazi na.

⁶ I ighita Yesu ta soghan we, ve ilaan ñaruini ila, ve itap izi Yesu naagho.

⁷⁻⁸ Yesu isaav pani ighe: “Avuvu saghati, ughau pani!”

* **4:41:** Mbo 65:7, 89:9, 107:29

Tauvene avuvu saghati tawe iboob aliina tiina kat ila neer tana aavo ighe: “Aii, Yesu! Yo Maaron Tiina Tau Iliiv Zimaronna Tisov na Naatu. Ulam sene pasaa? Yau nambaan payo ta ulam ne? Yau nataŋ rarai ghom ila Maaron eeza, ughur yavyavuun payau sov!” *

⁹ Yesu ighasoni ighe: “Ezam sei?”

I iyol aliina ighe: “Yau ezag Legion * (o Ndinndin Ndinndin). Pasaa, yei eval kat.”

¹⁰ Ra avuvu saghati tana itan rarai Yesu ariiaan ighe iziir zi tighau pa taan sirivu tawe sov.

¹¹ Nugh tawe, ngai umbaal tiina ee tilepleep izi loloz ziige, ve tighangan.

¹² Tauvene avuvu sasaghati tau tizeev neer tana na titan rarai Yesu tigde: “Ughur ghei ninarui ngai tawe. Upul ghei nilon nila lolozii.”

¹³ Yesu iyok pazi, tauvene tipul neer tana, ve tinarui ngai tawe tila le tizeev zi tilon tila lolozii. Ra ngai tawe tilaan taghon sariipa tizila, ve tiyaat tizila yaa loolo gha tighun yaa le tisov timatmaat. Ngai tau timaat na, irau ndinndin ndinndin ru (2,000) ma vene.

¹⁴⁻¹⁵ Yes tau tinginngin ngai na, tighita gabua tana, ve tighau tila tipaesia vaaru izi nugh toozi ve nugh siriv tau tigharau zi na paam. Tauvene tamtamon tisov tila tigde tighita gabua tau ivot na. Tila tivot to Yesu, ve tighita neer tau muun avuvu sasaghati katini tizeeva na, ngar tooni poia ivot

* **5:7-8:** Mt 25:41; Mk 1:24; Yems 2:19 * **5:9:** ‘Legion’, ene saveen Latin. Ngun ee to zaaba irau tamtamon 6,000, yes Roma tiwaato tigde ‘Legion’.

wa. I inonogh ghi pa nonoghiina, ve mboole izi ilepleep. Tauvene roin tiina igham zi.

¹⁶ Ra yes tau tileep ve tighita gabua tau ivot pa neer tana ve ngai na, tipaesia gabua tana.

¹⁷ Eval tiina tiloon saveen toozi, ve titan rarai Yesu tigde ipul nugh toozi, ve ila pa nugh ite paam.

¹⁸ Tauvene Yesu imuul ila iza waan ve yesna mbiwa tooni tigde tivot tila. Saawe tana, neer tau muun avuvu sasaghati katini tizevzeeva na ilam, ve ighason Yesu ariiaan ighe iyok pani ve yesna tila.

¹⁹ Eemon Yesu iyok pani mako. Isaav pani ighe: “Umuul ula pa nugh tsio, ve usavia uraat tiina tau Maaron igham payo na vaaru pa zetamja. Pa Maaron loolo isaghatin ghom ve iuul ghom uleep poia.”

²⁰ Tauvene neer tana imuul ila, ve ivotia uraat tiina tau Yesu igham pani na vaaru irau nugh nugh tau tighen ila taan sirivu to Dekapolis na. Tamtamon tisov tau tiloon saveen tooni na, tirur pa Maaron tapiri le ngar toozi imbool.

Yesu igharaat livaa ee, ve ipaburigin Yairus natliva pa mateegh

(Mt 9:18-26; Lu 8:40-56)

²¹ Yesu tomania mbiwa tooni tigham waan, ve timuul tila pa yaa naliu ziige ite. Saawe tau tila tiloon, eval tiina kat tila tilivut Yesu izi nari.

²² Ra daaba ee, eeza Yairus, ila ivot. I yesna zeran siriv tinjinnin nugh tawe rumei toozi. I ighita Yesu, ve itap izi Yesu aaghe puughu,

²³ ve itan raraini ighe: “Tiina tsiau, natug livaa igharau ighe imaat. Ulam tala ruum tsiau ve

ughur nimam izala paavo. Leso imaat sov, ve tiini poia muul.”

²⁴ Tauvene Yesu itaghoni gha yesuru tila. Tilaghlaagh tila, ve eval tiina tikeet taghon zi. Yes tivavagiriñi zi le tigiiriñ Yesu paam.

²⁵ Livaa ee ilaagh tomani zi paam. I, moroghoon to zilivaa ikisi irau ndaman sanjavul ve ru wa.

²⁶ Uraata katini to gharatoon moroghoonja titoova to tiuule, ve i iyamaan yavyavuun tiina ila nimazi, ve ipul maet tooni isov pa gholiin zi. Eemon eta irau iuule mako. Mako kat. Yes titoova, eemon tigham le moroghoon tooni isaghat kat.

²⁷⁻²⁸ Livaa tawe iloon Yesu vaaru wa. Tauvene maata ingal ighe: “Isaav ighe natut nonoghiinja tooni rigta, ene aat moroghoon tsiau tane isov, ve tinig poia.” Tauta ila itaghon eval tiina tawe, ve izuari ghi ila ila le itut Yesu nonoghiinja tooni. *

²⁹ Saawe duduun tana, siñ imot pani, ve iyamaan tauu ighe tiini poia wa.

³⁰ Ve Yesu paam, rekia mon iyamaan tauu ighe tapiri to uleñ igham tamtamon eta wa. Tauvene itoor ghi, ve maata imuul pa eval tiina, ve ighason zi ighe: “Ai, sei itut nonoghiinja tsiau?”

³¹ Mbiwa tooni tiyol aliinja tige: “Mindai ta ughason ughe sei ikis ghom? Ughita. Ene eval tiina tilivut ghom ve tivagiriñi zi. Eta aat itut ghom.”

³² Eemon Yesu maata ines ighe ighita sei kat ta igham ngar tana.

³³ Livaa tana iwatagh gabua tau ivot pani na. Tauvene roiñ tiina ighamu le tiini irur, ve ila iput

* **5:27-28:** Lu 6:19

aaghe izi Yesu naagho. Ra ivotia gabua isov tau ivot pani na.

³⁴ Yesu isaav pani ighe: “Livug, ghuruun ila tsio, tauta iuul ghom gha tinim poia wa. Ula toman lolom poia.” *

³⁵ Yesu isavsaav soone, ve zeran siriv tileep Yairus ruum tooni gha tilam, ve tipaes pani tigde: “Olman, ugherev sorokin mos puughu tane ilam pasaa? Natum livaa raa, imaat wa.”

³⁶ Eemon Yesu taliinja irav saveen toozi. Tau-vene isaav pa Yairus ighe: “Uroi sov. Ukis ghuruun ila tsio ariaan.”

³⁷ Ra ingalsekin eval tiina ighe tila tomania sov. Ve igham Petrus, Yakobus, ve taazi Yoan, gha yes mon tila.

³⁸ Tila tivot ruum to Yairus, ve Yesu ighita tam-tamon titanjan pa livaa marani toman oroor tiina, ve tilonjon tivotvot pa ruum loolo.

³⁹ Tauvene ilon ila ruum loolo, ve isaav pazi ighe: “Mindai ta yam atanjan ve aghamgham oroor tiina? Livaa marani imaat mako. Ene i igheen.”

⁴⁰ Yes tiloon saveen tooni tane, ve tinin pani. Yesu iziir zi tsov tivot tila muuri, ra igham livaa marani taama gha tiina, tomania mbiwa tooni tol tana, ve yesja tilon tila ruum loolo tau livaa marani igheen pani na.

⁴¹ Yesu ikis niima, ve isaav pani ighe: “Talita kum!” Saveen tane, puughu tauvene: “Livaa marani, yau nasaav payo: Uburig!” *

* **5:34:** Mk 10:52; Lu 7:50, 17:19 * **5:41:** Lu 7:14

⁴² Rekia mon maata iyaryaar, ve iburig ilaagh. Livaa marani tana, ndaman tooni irau saṅavul ve ru. Tamtamon tighita gabua ṅgereeta tana, le tirur ve ṅgar toozi imbool. *

⁴³ Eemon Yesu ṅgalsekin zi ariaaṅ ṅhe tisavia gabua tana vaaru pa tamtamon eta sov. Ra isaav pa livaa marani taama gha tiina ṅhe tigham aniin ṅlam gha ṅghan.

6

Tamtamon to Nasaret matazi veleghin Yesu (Mt 13:53-58; Lu 4:16-30)

¹ Yesu ipul nugh tawe, ve imuul ila pa nugh tooni puughu. Ve mbiwa tooni titaghoni gha yesṅa tila.

² Saawe to umbom patabuyaṅ, Yesu ilon ṅla rumei toozi, ve ipaghazonṅai zi pa Maaron aliinṅ. Tamtamon katini tau tiloon saveṅ tooni na, tirur pa ṅgar tooni, ve tisaav tigde: “Wai, ṅeer tane ṅgham ṅgar ve tapiri tiina tane izi sindei? ṅgar popoia tau i isasavia ne, ṅghamu ila to sei? Ve puughu mindai ta uraat ṅgeretazi tintiina tivotvot ila i niima? *

³ Mindai, i to nugh ite, ta iit takankaan pani ne? I ṅeer to raon ruum. Maria naatu. Ve tazṅa, ene Yakobus, Yoses, Yudas, ve Simon. Ve livṅa tisov, ta tilepleep tomani ghiit ne.” Tauvene matazi veleghini, ve lolozi pa tighur ila tooni mako. *

⁴ Tauta Yesu isaav pazi tauvene: “Isaav ṅhe tamtamon eta imin propet to Maaron, ene aat tauu nugh tooni puughu tomania ziiri waaro tooni, ve yes tau tileep tomania ila ruum tooni na, matazi

* **5:42:** Yo 11:43+ * **6:2:** Yo 7:15 * **6:3:** Yo 6:42

veleghini. Eemon isaav ighe i ila nugh ite, ene aat titandagh pani ve tipait eeza.” *

⁵ Tauvene Yesu irau igham gabua ngereeta tiina eta izi ta sewe mako. I ighur niima izala moroghoonja enjaenja mon pavozi gha tinizi poia.

⁶ Ve i igham ngar naol pa nugh tooni puughu: Mindai ta tighur ila tooni mako?

Tauvene Yesu iburig, ipul nugh tooni puughu, ve ilaghlaagh irau nugh nugh, ve ipaghazonjai tamtamon pa Maaron aliinja.

*Yesu imbaan mbiwa tooni sanjavul ve ru pa uraat
(Mt 10:5-15; Lu 9:1-6)*

⁷ Ra ipoi mbiwa tooni sanjavul ve ru tilam, ve ighur zi runrunja, leso tila pa uraat. Ve irei tapiri irau zi, ve ighur avuvu sasaghati tileep ila sambazi. Leso tiziir zi tighau pa tamtamon.

⁸⁻⁹ Ve isaav pazi tauvene: Saawe tau tila, yes irau tilaagh tomania gabua naol mako. Tighur zuzuunja to aghezi, ve tikis titi mon. Irau tigham gabua imin aniin ve pepeel mako, ve maet eta irau ighen ila lugluug toozi mako. Nonoghiinja toozi paam, irau tigham ru mako. Ee mon tau ighen ila tinizi, ene irao.

¹⁰ Ve Yesu isaav pazi tauvene: “Isaav ighe ala avot nugh eta, ruum sindei tau ighe tighur gham pani, na aleep ila ruum tana mon le apul nugh tawe ve ala.

¹¹ Ve isaav ighe nugh eta lolozu pa ghamuun gham mako, ve tizor gham tomania saveen tsiam,

* 6:4: Yo 4:44

na aghatuun aghemim, ve ngaupup to nugh toozi izi,*
o apul nugh tawe ve ala. Leso imin ilaal pazi pa sosor toozi.”*

¹² Yesu isavsaav pazi le isov, ra tila ve tivotia Maaron aliinja pa tamtamon, ve tisaav pazi tighe: “Yam apul ngar tsiam sasaghati ileple, ve atoor ngar tsiam ila pa Maaron.”

¹³ Ve tiziir avuvu sasaghati katini tighaughau, ve timus ngoreen to oliv izala moroghoona katini pavozi, ve tisuŋ Maaron pazi le tinizi poia muul.*

Mateegh to neer rughuzaana Yoan

(Mt 14:1-12; Lu 3:19-20, 9:7-9)

¹⁴ Saawe tana, Yesu vaaru ilaan irau nugh naol, ve kinik Erod † iloonja paam. Tamtamon siriv tighe: “Ewe aat neer rughuzaana Yoan. I imaat ve Maaron ipaburigini pa mateegh. Tauta tapiri tiina igheen tooni, ve ighamgham gabua ngeretazi.”*

¹⁵ Ve tamtamon siriv tighe: “Mako. I aat propet Ilia tau imuul ilam.” Ve siriv tighe: “Mako, i aat igham uraat imin propet munganazi siriv.”*

¹⁶ Saawe tau Erod iloon Yesu vaaru, i isaav pa tauu ighe: “Ewe aat Yoan. Neer tau narav motin luua na, tauta Maaron ipaburigini pa mateegh.”

¹⁷⁻¹⁹ I isaav tauvene pasaa, maata ingal ngar tau i igham pa Yoan na. Ngar tauvene: Muun, Erod isan toogha Pilip azaawa Erodias ve ivaii. Saawe

* **6:11:** Paesiinj to saveenj ziiri tane igheen ila Mt 10:14. * **6:11:**

Mbanj 13:51 * **6:13:** Yems 5:14+ † **6:14:** Erod tane, i ingin taan sirivu to Galilaia. Eeza ite Antipas. * **6:14:** Mk 8:28 * **6:15:** Mt 16:14; Yo 4:19, 9:17

tana, Yoan ilala tooni, ve inoknok saveeņ pani ighe: “Ngar tau ugham pa togham azaawa na, ene iduduņ pa tutuņ to Maaron mako.” *

Yoan saveeņ tooni tane igham Erod azaawa aate yavyav. Tauvene iliil eez to iravu imaat. Eemon irao mako. Tauta Erod imbaaņ tamtamon siriv tila tikis Yoan, ve tikauu, ve tighuru ilonj ila ruum to yavyavuņ, leso igham azaawa loolo poia.

²⁰ Erod iwatagh ighe Yoan, i ņeer patabuyaaj, ve ņeer duduņja ee ila Maaron maata. Tauvene iroi pani. Saawe tau Yoan isavsavv pani, saveeņ tooni ingali le igham ņgar naol. Eemon Erod ighe le ilonjlooj saveeņ tooni. Tauta saawe tau Yoan ileep ila ruum to yavyavuņ, Erod ighamgham poghania.

²¹ Tilepleep le saawe poia ee ivot pa Erodias to irav Yoan imaat. Tizaa pa saawe to Erod tiina ipoopa, ra Erod igham ghanghaniņ tiina, ve ipoi yes daaba tau tinģinģin uraat tooni na, ve yes daaba to malmal, tomania daaba siriv to Galilaia paam tilam, ve yesņa tilup zi pa ghanghaniņ.

²² Saawe tana, Erodias natliva ilonj ila, ve itor izi naghozi, le isan Erod tomania zeetņa tawe atezi. Tauvene Erod isik aliinja pani ighe: “Aa enes, saa kaut tau ighe yo ughason ghau pani, yau aat naghamb payo!”

²³ Ve ipariaaņ saveeņ mbuaaņ tooni tana le iyaryaaj kat ighe: “Onoon saanja! Saa kaut tau ighe yo ughason ghau pani, yau aat naghamb payo. Isaav ighe yo ughe navalagh gabua naol isov tau nanģiniir zi ne, ve naghamb lem sirivu, ene poia paam!”

* **6:17-19:** Wkp 18:16

²⁴ Erod isavia saveeŋ tane le isov, ra livaa paaghu ivot ila muuri, ve ighason tiina ighe: “Mindai, pale naghasoni pa saa kaut?”

Tiina isaav pani ighe: “Ughasoni pa Yoan tau ŋeer rughuzaaŋa na daaba.”

²⁵ Tauvene livaa paaghu rekiā mon ila to kinik Erod muul, ve isaav pani ighe: “Yau naghe ughur ŋeer rughuzaaŋa Yoan daaba ila oon, ve ughamu ilam payau ta aazne.”

²⁶ Kinik Erod ilooŋ saveeŋ tane le loolo ipataŋan kat. Eemon irau itoor aliŋa muul mako. Pasaa, imbu saveeŋ ariaaŋ pani ila zeetŋa tau yesŋa tilup zi pa ghanghaniŋ na matazi wa.

²⁷⁻²⁸ Tauvene rekiā mon imbaaŋ zaaba tooni ee ighe ila irav motin Yoan luua, ve igham daaba ilam. Zaaba tawe itaghon Erod aliŋa, ve ila irav motin Yoan luua. Ra ighur daaba ila oon loolo, ve ighamu ilam, ve izuzuuna ila pa livaa paaghu. Mako i aana isakia ila to tiina.

²⁹ Murei ra, yes mbiwa to Yoan tilooŋ gabua tana vaaru. Tauvene tila tigham Yoan paata, ve tila tighuru ilooŋ ila maet puura ee tau tigharaat imin naal pa mateegha.

Yesu ipan tamtamon ndiŋndiŋ ndiŋndiŋ liim (5,000)

(2King 4:42-44; Mt 14:13-21; Lu 9:10-17; Yo 6:1-14)

³⁰ Yesu mbaŋooŋa tooni tigham uraat le isov, ra timuul tilam tivot tooni, ve tipaes pani pa uraat isov tau tighamu, tomania saveeŋ isov tau tipaduduun tamtamon pani na.

³¹ Saawe tana, tamtamon katini tilala tilamlam, le Yesu tomania mbiwa tooni lezi sooso eta to

timariau ve tighan aniin ne mako. Tauvene Yesu isaav pazi ighe: “Aiyo, aburig ve tala pa nugh nginaanja eta. Leso zigaan taleep ve tamariau.”

³² Tauvene tigham waan tighe tila pa nugh nginaanja ee. Leso zigazi tileep ta sewe ve timariau.

³³ Eemon eval tiina tighit zi tiraav tila, ve tighilaal zi pa ghaon toozi. Tauvene tamtamon to nugh naol tilaagh taan, ve titaghon Yesu tila. Yesu tomania mbiwa tooni tighaughau soone, ve eval tiina tawe timuun tila tivot nugh tau Yesu tomania mbiwa tooni tighe tila pani na, gha tisaanan.

³⁴ Malau mako ve Yesu tomania mbiwa tooni tilam tiloon. Yesu iyaat izi pa waan, ve ighita eval tiina tana le loolo isaghatin zi. Pasaa, yes tileep imin sipsip tau lezi nginiin mako. Tauvene i ipaburigin saveen tooni ve ipaghazonai zi pa gabua naol.

³⁵ Tilepleep le ravrav izi, ra mbiwa tooni tila tisaav pani tighe: “Laak, ene taleep izi nugh nginaanja ve mbon izi wa.

³⁶ Usaav pa eval tiina tane tila pa nugh siriv tau tigheen tatanan ne. Leso tighol lezi aniin ve tighan.”

³⁷ Eemon Yesu isaav pazi ighe: “Mako. Yam taumim agham aniin pazi to tighan.”

Yes tiyol aliina tighe: “Wai, yo ughe yei nila nighol aniin pa eval tiina tane? Isaav ighe nighol aniin irau maet denari ‡ 200, pale irao zi wa?”

‡ **6:37:** Denari, ene maet ee eeza. Saawe tau Yesu ileep izi taan, isaav ighe tamtamon eta igham uraat irau aaz ee, ene tigham le atuya irau denari ee.

38 Tauvene Yesu isaav pazi ighe: “Ala aghita. Lemim mberet piiz ighengheen?”

Yes tila tighita le isov, ra timuul tilam ve tipaes pani tigha: “Iit leen mberet liim, ve iigh ru.”

39-40 Ra Yesu isaav pazi ighe tighur eval tiina tana ila ŋgun ŋgun, ve tisaav pazi lesu mbolezi izala kikiliin popoia tawe paavo. Tauvene titaghon Yesu aliina, ve mbolezi izi ila ŋgun ŋgun. Ŋgun siriv irau tamtamon ndiŋndiŋ ee (100), ve ŋgun siriv irau tamoot ru saŋavul (50).

41 Ra Yesu igham mberet liim tomania iigh ru tawe, ikis zi, ve maata izala pa sambam, ve ipait Maaron pa aniiŋ tana. Isuŋ le isov, ra iteev mberet tana, ve ighuru ila mbiwa tooni nimazi, lesu anazi tila tireii pa tamtamon. I igham ŋgar raraate pa iigh ru tana paam, gha eval tiina tighan.

42 Tauvene tisov tighan le apozi isuŋ.

43 Ve mberet tomania iigh tau tighan ve sirivu izi na, mbiwa tooni tigooga, ve tinonogh zi tila nakaral saŋavul ve ru le tivoniir.

44 Yes tau tighan aniiŋ tana, yes zitamoot mon, irau ndiŋndiŋ ndiŋndiŋ liim (5,000) ma vene.

Yesu ilaagh izala yaa paavo

(Mt 14:22-33; Yo 6:15-21)

45 Tighan le isov, ra Yesu ipasul mbiwa tooni ighe tizaa waan, lesu timuun tila tivool pa nugh Betsaida tau igheen ila yaa naliu ziige ite. Ve i ileep, lesu ighur eval tiina tawe timuul tila pa nugh toz toz.

46 I ighur zi tila, ra izala pa loloz, lesu ileep ta sewe ve isuŋ. *

* 6:46: Mk 1:35

⁴⁷ Waan̄ tau mbiwa tooni tizaa gha tila na ighaughau ila le ivot bodbodaan̄ to yaa naliu, ra mbon̄ izi pazi. Saawe tana, Yesu zigani ileep izi taan.

⁴⁸ Maata ila le ighita patan̄ani ivot pa mbiwa tooni. Pasaa, yes tisoop yaghur ve tila. Tauvene tigham uraat tiina pa goraan̄. Yesu ilepleep le igharau ighe nughitun, ra izila nari, ve ilaagh izala yaa paavo in̄arui zi ila le ighe isaliv zi.

⁴⁹⁻⁵⁰ Mbiwa tooni matazi ila le tighita Yesu ilaghaagh izala yaa paavo gha ilam. Yes tisoov tighita, ve tigde pa mariaam. Tauvene roin̄ tiina igham zi ve tisan̄een̄ saghat.

Eemon Yesu rekia mon ve isaav pazi ighe: “Ai, aroi sov. Atemim izi. Ene yau.”

⁵¹ Ra ila izaa waan̄ tomani zi. Saawe tana, yaghur ma dibom isov. Mbiwa tooni tighita gabua n̄gereeta tana le tirur ve n̄gar toozi imbool.

⁵² Pasaa, gabua n̄gereeta tau Yesu igham pa mberet na, igham n̄gar toozi ivot soone. Lezi ghilaloon̄ mako pasaa, lolozu iyaryaan̄ kat. *

Yesu igharaat moroghoon̄a katini izi nugh Gene-saret

(Mt 14:34-36)

⁵³ Yesu tomania mbiwa tooni tila tivool pa yaa naliu ziige ite, ve tila tiloon̄ nari to nugh Gene-saret, ve timbit waan̄ toozi ta sewe.

⁵⁴ Saawe tau tiyaat tizi pa waan̄, eval tiina rekia mon ve tighilaal Yesu.

⁵⁵ Tauvene tilaan̄ tila ve tipaesia vaaru irau nugh tisoov tau tigharau na. Tauvene saawe tau tamtamon tiloon̄ tigde Yesu ila ivot nugh eta,

* 6:52: Mk 8:17

mako tibadbaad moroghoonja toozi izala boor, ve tinjaruini tila, leso iuul zi.

⁵⁶ Yesu ilaghlaagh irau nugh tintiina, nugh geegeu, ve taghon ziige ziige paam. Saawe tau i ila ivot nugh eta, mako tiyau moroghoonja toozi tila maaran, ve titaŋ raraini tigha tikis nonoghiinja tooni ziige rigta mon, o poia. Ve tamtamon tisov tau tikisi na, Yesu tapiri igham zi tinizi popoia. *

7

Tutuun to Maaron iliiv tutuun to yes Yuda timbuzŋa

(Mt 15:1-9)

¹⁻⁴ Zeran tutuunja tomania Yuda siriv paam tibesbees pa Maaron itaghton tutuun tau timbuzŋa titagthoni muun ve ilam. Ngar toozi tauvene: Irau tighan aniiŋ rekia mako. Timin nimazi itaghton tutuun toozi, le tingalaan ila Maaron maata, o tighan. Ve tutuun toozi ite isaav tauvene: Igha tila nugh to raukoliin ve timuul tilam, ene yes aat titir yaa izala pavozi ve timin muun ilale. Leso tingalaan muul, ve tighan aniiŋ. Yes lezi tutuun naol tauvene. Tutuun siriv inarui miniiŋ uur ve rubruub, ve tutuun siriv inarui gabua siriv paam. *

Zeran tutuunja siriv tomania ngara siriv to tutuun tipul Yerusalem, ve tila tileep tomania Yesu. Yes tighita mbiwa tooni titaghton tutuun toozi to miniiŋ nimazi mako, ve rekia mon tighan aniiŋ. Tauvene tighit zi le irau lolozi mako. Pasaa,

* **6:56:** Mt 9:20, 14:36; Mban 19:12 * **7:1-4:** Mt 23:25+

mbiwa tooni nimazi ingalaan mako, ve tigham aniiñ gha tighan. *

⁵ Tauvene tighason Yesu tige: “Ughita. Mbiwa tsio tana nimazi ingalaan mako ve tighan aniiñ. Puughu mindai ta titaghon tutuun to timbuunja mako?”

⁶ Yesu iyol alinazi ighe: “Yam zeran to karom. Apapamir taumim pa ghuruun ila tsiam! Muun, propet Isaia ivotia Maaron aliiñ ziiiri ee tau iduduun kat pa ngar tau yam aghamghamu na. Isaav tauvene:

‘Zeran tane tipapait ghau sorok pa avozi uuli mon.

Eemon lolozi, ene igheen malau kat payau.

⁷ Saveen ve tutuun katini tau tipaduduun tamtamon pani, ene itaghon ngar tsiau mako. Itaghon ngar to tamtamon mon.

Tauta sunuun ve besoon toozi tau monmon tighamgham payau ne, ene imin kaut sorok, ve le anoonja mako.’ ” *

⁸ Ve Yesu isaav pazi muul ighe: “Tutuun tau Maaron tauu ighuru, ene yam apuli wa. Ve tutuun tau tamtamon tighuru, tauta yam akisi tunja, ve ataghoni.”

⁹ Yesu iseen saveen tooni muul ighe: “Yam aghur murimim pa tutuun to Maaron, ve apuli izi ileple. Leso apariaan tutuun to timbuminja, ve ataghoni. Ngar tauvene, yam arau kat pani!

¹⁰ Aghita. Tutuun to Mose isaav tauvene:

‘Matam lonlonai pa tamam gha tinam ve utandagh pazi.’

* **7:1-4:** Lu 11:38 * **7:7:** Is 29:13; Kol 2:20+; Tit 1:14

Ve 'isaav ighe tamtamon eta isik saveen saghati pa taama ma tiina, i aat imaat.' *

11-12 Eemon yam asavsaav tauvene: 'Ige tamtamon eta le gabua to iuul taama ma tiina pani, eemon igham pazi mako, ve isaav pazi ighe: 'O, gabua tane, yau irau naghampayam mako. Pa ene nawaat Maaron eeza pani wa.' Ige tamtamon eta igham tauvene, ve murei itoor ngar tooni ve ighe igham gabua tana pa taama ma tiina, na yam angalsekini aghe i igham tauvene sov.

13 Tauvene tutuun tau timbumimn̄a tigham payam ve aazne ataghoni, ene igham gham atatan Maaron saveen tooni izi imin kaut sorok. Ve ngar tsiam naol tau aghamgham zi ne, ene raratezi mon."

Gabua tau igham tamtamon tisaghat ila Maaron maata
(Mt 15:10-20)

14 Yesu isavsaav tomani zi le isov, ra ipoi eval tiina tilam tooni muul, ve isaav pazi ighe: "Yam asov aloon saveen tsiau tane, ve agham ngar pani poi.

15-16 Gabua tau tamtamon tighamu ve tighani gha izila apozi, eta irau igham zi tisaghat ila Maaron maata ne mako. Ngar sasaghati tau igheen ila lolozi ve ivotvot, tauta igham zi tisaghat ila Maaron maata." *

17 Yesu ipul eval tiina tawe tileep muuri, ve ilon ila pa ruum, ra mbiwa tooni tighasoni pa saveen tooni puughu.

* 7:10: Igham 20:12, 21:17

* 7:15-16: Mban̄ 10:14+; Ro 14:14, 20; 1Tim 4:4

18 I isaav pazi ighe: “Wai, yam paam lemim n̄gar mako? Aghilaal soone? Gabua naol isov tau tamtamon tigham zi ve tighan zi gha izila apozi, eta irau igham zi tisaghat ila Maaron maata ne mako.

19 Pasaa, gabua tauvene igham gabua eta pa lolozi mako. Izila pa apozi mon, ve malau mako timbeghazi gha ilale.”

Yesu saveen̄ tooni tane ipaghazon̄ai ghiit ighe gabua naol isov poia to taghani. Eta irau igham ghiit tasaghat ila Maaron maata mako.

20 Ve Yesu isaav muul ighe: “N̄gar sasaghati tau igheen ila tamtamon lolozi ve ivotvot, tauta igham zi tisaghat ila Maaron maata.

21-22 Pasaa, n̄gar sasaghati tau igheen ila tamtamon lolozi ve ivotvot, tauta ipapaburigin zi gha matazi ingal n̄gar sasaghati naol imin: tighur boog, tium, tirav tamtamon timaat, tivaghamunia vain̄, matazi aniin̄, tigham taliin̄zizi, tigham karom, matazi saghati imin n̄gavuun ve n̄gai, tighur koi pa zetaz̄na tau lezi gabua katini, tisik saveen̄ saghati pa zetaz̄na ve Maaron paam, tipait tauzi ezazi, ve tigham n̄gar sasaghati siriv paam imin yes tau tikankaan pa Maaron.

23 N̄gar sasaghati naol tane tau ighengheen ila tamtamon lolozi ve ivotvot, tauta igham zi tisaghat ila Maaron maata.”

*Grik tinazi ee to Ponisia ighur ila to Yesu ariaan̄
(Mt 15:21-28)*

24 Yesu ipaburigin laghoon̄ tooni muul, ipul nugh tawe, ve ilaagh ila ivot taan sirivu tau nugh tiina Tiro igheen pani. Ra ilon̄ ila ruum ee to nugh

tawe ve ileep. I loolo pa tamtamon tiwatagh ruum tau i ileep pani ne mako. Eemon mako. Pasaa, tamtamon tighita wa.

²⁵⁻²⁶ Livaa ee to nugh tawe, avuvu saghati izeev natliva marani. Livaa tawe, i Yuda mako. I Grik tinazi to taan Ponisia tau igheen ila taan sirivu to Siria. I ilooŋ Yesu vaaru, ve rekia mon iŋarui Yesu ila, itap izi Yesu aaghe puughu, ve itaŋ raraini ighe iziir avuvu saghati tawe ighau pa natliva.

²⁷ Yesu isaav pani tauvene: “Isaav ighe tasan aniiŋ to yes geegeu, ve tasiki rekia mon ila ŋgavuun tighani, ene iduduunŋ mako. Yes geegeu tighan imin maata le apozi isuŋ, o tasik aniiŋ sirivu ila pa ŋgavuun.” *

²⁸ Livaa tana iyol aliinŋa ighe: “Tiina, aliŋam poia. Eemon ŋgavuun paam tisanan. Isaav ighe yes geegeu tighanghan, ve aniiŋ ŋgirŋgiira itaptap izi taan, ene imin ŋgavuun lezi to tighan.”

²⁹ Yesu ilooŋ saveeŋ tane, ve isaav pani muul ighe: “Yo upat aliŋag le iduduunŋ kat. Tauvene umuul ula pa ruum toman lolom poia. Pa avuvu saghati ighau pa natumliva wa.”

³⁰ Tauvene livaa tana imuul ila pa ruum, ve ighita natliva ighengheen izala niia to ghenooŋ. Avuvu saghati ighau pani ve tiini poia wa.

Yesu igharaat ŋeer ee tau taliinŋa tomania aavo ivool

³¹ Yesu ipul taan sirivu to Tiro, ve isakia laghoonŋ tooni ila ivot nugh Sidon. Ra ilivut imuul ilam,

* **7:27:** Saveeŋ to Yesu tane, puughu tauvene: I aat igham uraat ila yes Yuda sosozi le isov, o pooz to Maaron ila irau nugh nugh tau Yuda mako na paam.

ve imbut taan sirivu to Dekapolis, ve ila ivot yaa naliu Galilaia muul. *

³² I ilepleep ta sewe, ve tigham njeer ee ila tooni. Njeer tawe, taliinja paamu ve irau isavia saveenj eta ighazonj mako. Tauvene titanj rarai Yesu tigha ighur niima izala njeer tana paavo, lesa tiini poia.

³³ Yesu ighamu ve yesuru tila soghan rig pa eval tiina, ra izeev niima nguruunja ru ilonj ila njeer tana taliinja. Le isov, mako injazuv ila niima, ve ighur niima ila njeer tana yaama. *

³⁴ Ra maata iza pa sambam, iyavaghan, ve isaav pani igha: “Epata!” †

(Saveenj tane, puughu tauvene: ‘Ukaak!’)

³⁵ Reikia mon ve njeer tana taliinja tomania aavo pakia, ve isaav aliinja ivot ighazonj. *

³⁶ Yesu ingalsekin zi ariaanj igha tivotia gabua ngereeta tana vaaru pa tamtamon eta sov. Eemon mako. Onoon, i ingalsekin zi pai katini. Eemon yes tinoknok votiaanj gabua tana vaaru taghon gha ila.

³⁷ Tamtamon tisov tau tiloonj gabua tana vaaru, tirur tiina kat le ngar toozi imbool, ve tisaav tigha: “Wai, njeer tane, i irau kat. Gabua naol isov tau i ighamgham zi na, ene popoia mon. Aghita. Yes tau talinjazi paamu, ve yes tau avozi ivool na paam, i igham zi tilonloonj saveenj ve tisavsaav.”

8

* **7:31:** Mt 15:29+ * **7:33:** Mk 8:23; Yo 9:6 † **7:34:** ‘Epata’, ene saveenj Aramea. Saveenj Aramea igharau saveenj Hibru. Saawe tau Yesu ileep izi taan, eval tiina to Israel tisavia alinjazi ru: Aramea, ve Hibru. * **7:35:** Is 35:5-6

*Yesu ipan tamtamon ndiɲndiɲ ndiɲndiɲ paanɲ
(4,000)
(Mt 15:32-39)*

¹ Saawe tana, eval tiina kat tila tilup zi toman Yesu muul, ve yesɲa tilepleep le aniin toozi isov. Tauvene Yesu ipoi mbiwa tooni tilam, ve isaav pazi ighe:

² “Yau lolog isaghatin eval tiina tane. Pasaa, itiɲa takaria lepooɲ gha mboɲ imin tol wa. Ve lezi aniin eta to tighan mako.

³ Isaav ighe naziir zi tila toman pitool zi, ene pale tapirizi isov ve matazi ililiit izi eez livuugha. Pasaa, tamtamon toozi siriv tilaagh nugh malau tilam.”

⁴ Mbiwa tooni tiyol aliinɲa tigue: “Wai, ene taleep nugh nɲinaaɲa. Pale tagham aniin sindei ve tagham pa eval tiina tane?”

⁵ Tauvene Yesu ighason zi ighe: “Mberet tsiam piiz ighengheen?”

Yes tiyol ghasoniin tooni tigue: “Liim ve ru.”

⁶ Ra Yesu isaav pa eval tiina mbolezi izi taan, ve igham mberet liim ve ru tawe, ve ipait Maaron pani. Le isov, ra iteeva, ve ighuru ila to mbiwa tooni. Leso anazi tila tireii pa eval tiina. Tauvene tighamu tila, ve tireii pazi.

⁷ Yes lezi iigh geegeu siriv paam. Yesu ipait Maaron pa iigh tana, ra isaav pazi tila tireii pa tamtamon.

⁸ Eval tiina tawe tighan le apozi isunɲ. Ve avozi muuri tau izi na, mbiwa tooni tigooga, ve tinonogh zi tila nakaral tintiina liim ve ru le tivoniir.

⁹⁻¹⁰ Eval tiina tau tighan aniiñ tana, yes irau ndiñndiñ ndiñndiñ paañ (4,000) ma vene. Tighan le isov, ra Yesu ighur zi timuul tila pa nugh toz toz, ve rekia mon tomania mbiwa tooni tizila muul pa nari gha tizaa waañ toozi, ve tiraav tila tivool pa taan sirivu to Dalmanuta.

Zeran tutuuña tigde tighita Yesu igham gabua ñgereeta eta imin ilaal pazi

(Mt 12:38-39, 16:1-4; Lu 11:16, 29)

¹¹ Yesu ileep ta sewe, ve zeran tutuuña siriv tiñaruini tila tigde titoova. Yesña Yesu tivazorai zi, ve tizoornugh tigde i igham gabua ñgereeta imin ilaal pazi. Leso tiwatagh tigde Maaron to sambam ileep tomania pa uraat tooni. *

¹² Yesu isaav pazi imin mbuziriin igha: “Oyais, puughu mindai ta zeran to aazne tizuari zi pa ghitoon ilaal? Yau nasaav payam kat: Maaron irau itotoi gabua eta imin ilaal pazi ne mako. Mako kat.”

¹³ Ra ipul zi tileep, ve izila nari gha izaa waañ muul, ve yesña mbiwa tooni timuul tila tivool pa yaa naliu ziige ite.

Yis to Erod ve zeran tutuuña

(Mt 16:5-12)

¹⁴ Mbiwa tooni loloji iveegh ve tigham lezi tamaz mako. Tigham mberet eemon geeg ta igheen izi waañ.

* **8:11:** Yo 6:30

15 Yes tighaughau tila, ve Yesu maata iŋgal pa ŋgar sasaghati to Erod ve yes zeran tutuuŋa. Tauvene iveveen mbiwa tooni ighe: “Matamim imoos poi pa taumim, ve ayamaan gham pa yis to Erod ve yes zeran tutuuŋa!” *

16 Eemon mbiwa tooni tighilaal saveeŋ tooni puughu mako. Tauvene ayazi iŋgal zi sorok ve tivasavo zi tigde: “I aat isaav pait pasaa, loloon iveegh ve tagham leen mberet mako.”

17 Yesu iwatagh ŋgar toozi wa. Tauvene isaav pazi muul ighe: “Yam ayau avomim pa mberet pasaa? Aghilaal ghau soone? Lolomim aat iyaryaŋ kat, tauta aghazooŋ payau soone.” *

18-19 Yam lemim matamim ve taliŋamim. Mindai ta aghita gabua mako, ve alooŋ saveeŋ mako? Lolomim iveegh wa? Saawe tau nateev mberet liim mon pa tamtamon ndiŋndiŋ ndiŋndiŋ liim (5,000) na, yam agoog aniŋ siriv siriv, ve apavon nakaral piiz?”

Yes tiyol aliŋa tigde: “Saŋavul ve ru.” *

20 Yesu ighason zi muul ighe: “Ve saawe tau nateev mberet liim ve ru pa tamtamon ndiŋndiŋ ndiŋndiŋ paan (4,000) na, yam agoog aniŋ siriv siriv ve apavon nakaral piiz?”

Yes tiyol aliŋa tigde: “Liim ve ru.”

21 Ra Yesu isaav pazi ighe: “Mindai? Ŋgar tsiam ighazooŋ soone?”

Yesu igharaat maata kumkuuma ee izi nugh Bet-saida

* **8:15:** Lu 12:1; 1Kor 5:6+ * **8:17:** Mk 6:52 * **8:18-19:** Mk 4:12; Mban 28:26+

²² Yesu tomania mbiwa tooni tila tiloon nugh Betsaida, ve tamtamon siriv tigham ñeer maata kumkuuma ee ilam tooni, ve titañ rarai Yesu tigde ighur niima izala ñeer tawe paavo ve igharaat maata.

²³ Tauvene Yesu ikis maata kumkuuma tana niima, ve igherevu gha yesuru tila tivot nugh ziige. Yesuru tiyooz ta sewe, ve Yesu ighur ñazuuva ila ñeer tana maata, ve niima ru izala paavo. Ra ighasoni ighe: “Mindai, ughita gabua eta, ma mako?”

²⁴ Ñeer tana maata ila, ve isaav pani ighe: “Vee! Yau naghita tamtamon siriv tilaghlaagh. Eemon naghit poghani zi mako. Ghitoñazi imin ai ma vene.”

²⁵ Tauvene Yesu ighur niima ila ikis ñeer tana maata muul. Ñeer tana itugtugh maata ila ila le maata pakia, ve ighita gabua naol isov ighazoon.

²⁶ Ra Yesu isaav pani ighe: “Umuul ula pa nughei sov. Malmalim ula pa ruum tsio.”

*Petrus ivotia Yesu ighe i Mesia
(Mt 16:13-20; Lu 9:18-21)*

²⁷ Yesu tomania mbiwa tooni tipul nugh Betsaida, ve tigde tila pa nugh geegeu siriv tau tigharau nugh tiina Sisarea Pilipai. Tilaghlaagh taghon eez tila, ve Yesu ighason zi ighe: “Laak, tamtamon tigham ñgar tigde yau sei?”

²⁸ Yes tiyol ghasoniin tooni tigde: “Zeran siriv tigde yo ñeer rughuzaaṅa Yoan, ve siriv tigde yo propet Iliia, ve siriv tigde yo propet ite paam.”

²⁹ Yesu ighason zi muul ighe: “Ve yam taumim, aghe yau sei?”

Petrus iyol aliinja ighe: “Yo Mesia.” * *

³⁰ Petrus isavsaav le isov, ra Yesu ingalsekin zi ariaan ighe tivotia saveen tana pa tamtamon eta sov.

Yesu isavia mateegh ve burigiin tooni

(Mt 16:21-23; Lu 9:22)

³¹ Saawe tana, Yesu iburig ve ipaghazonjai tauu pa mbiwa tooni ighe: “Tamtamon Naatu, i aat ibaad patañani naol, ve yavyavuun tiina ighamu itaghon Taama Maaron ngar tooni. Ve yes pooza tomania yes daaba to watoonrau, ve yes ngara to tutuun pale tizori, ve tiravu imaat. Eemon mbon imin tol, i pale iburig pa mateegh.”

³² Yesu isaav ghazonja pazi. Tauvene Petrus ighamu ila ziige, ve iyaoni.

³³ Eemon Yesu itoor ghi, maata imuul pa mbiwa tooni siriv, ve iyaon Petrus ighe: “Sadon, ughau ula pa murig! Ngar tsio itaghon Maaron ngar tooni mako. Yo utaghon ngar to tamtamon mon.”

Eez to tataghon Yesu

(Mt 16:24-28; Lu 9:23-27)

³⁴ Ra Yesu ipoi eval tiina tilam tilup zi tomania mbiwa tooni, ve isaav pazi ighe: “Isaav ighe tamtamon eta ighe imin leg ve itaghon eez tsiau, i aat itatan tauu, ibaad ai pambaroon tooni, † ve ilam itaghon ghau. *

³⁵ Pa ighe tamtamon eta iil eez pa tauu leso ileep poia izi taan, ene pale ilale. Ve isaav ighe tamtamon eta loolo eemon ve ipul tauu payau ve uraat

* **8:29:** Paesiin to saveen ziiri tane igheen ila Mt 16:16. * **8:29:** Yo 6:68, 11:27 † **8:34:** Ai pambaroon toit, ene patañani maata maata tau tabaad zi pasaa, tataghon Yesu. * **8:34:** Mt 10:37+

to vaaru poia, i aat igham lepoogh poia ila to Maaron.*

³⁶ Isaav igha tamtamon eta igham gabua popoiazi naol isov to taan, eemon tauu anunu ilale, ene pale gabua naol tawe tiuule mindai? Mako.

³⁷ Pale tamtamon tana igham saa gabua ve iravol anunu pani? Mako kat.”*

³⁸ “Tamtamon to aazne, yes sasaghatizi kat. Tighur murizi pa Maaron imin livaa tau ipul azaawa ve igham tamoot paaghu. Isaav igha tsiam eta maaya payau ve saveerj tsiau, ve ipaisamun ghau ila yes tane matazi, ene pale saawe to Tamtamon Naatu imuul ilam tomania aņela tooni patabuyaana, ve itotoi Taama Maaron mbonari ve tapiri ivot ighazoon, i pale ipaisamun tamtamon tana eeza paam.”*

9

Yesu itotoi mbonari ivot ighazoon (Mt 17:1-13; Lu 9:28-36)

¹ Yesu isaav pazi muul igha: “Yau nasaav payam kat. Tamtamon siriv tau itinja tayozyooz ne, aat timaat soone, ve tighita Maaron itotoi pooz tooni ivot ighazoon toman tapiri tiina.”**

² Mboņ liim ve ee ilam ila, ra Yesu igham Petrus, Yakobus, ve Yoan, gha yes paan tizala loloz ee tau

* **8:35:** Lu 17:33; Yo 12:25 * **8:37:** Mbo 49:7+ * **8:38:** Mt 10:33; Ro 1:16; 2Tim 2:12 * **9:1:** Nğara katini tigha Yesu isavia saawe tau yesņa mbiwa tooni tol tizala loloz, ve itotoi mbonari ivot ighazoon. Ve nğara siriv tigha i isavia saawe to Pentekos ve ilam. Pasaa, saawe tana, uraat to votiaan vaaru poia ilaan toman tapiri tiina. * **9:1:** Mt 16:28; Lu 9:27

daaba izala kat. Leso zigazi tileep. Tilepleep ta sewe, ve Yesu tiini itoora ila yes tol matazi.

³ Ve nonoghiina tooni paam, ipisosoŋ kat ve milmilia. Tamtamon eta to taan irau igham kawaal ipisosoŋ kat tauvene ne mako.

⁴ Tilepleep ve tighita Ilia yesuru Mose tivot gha yesŋa Yesu tisavsaav.

⁵ Tauvene Petrus iburig ve isaav ila pa Yesu ighe: “Paduduŋaŋ, taleep ta sene, kanan poia kat. Mindai, pale nirau balbaal tol? Ee payo, ee pa Mose, ve ee pa Ilia?”

⁶ Aliina tane, i igham ŋgar poi ve isavia mako. Isaav sorok. Pasaa, tomania zeetŋa ru tiroi kat.

⁷ Malau mako na, taitai izi le ikau zi. Ra tiloon Maaron aliina ivot ila taitai tawe loolo ighe: “Ena yau taug Natug tau lolog igheen tooni kat. Aloon aliina ve ataghoni!” *

⁸ Reikia mon mbiwa tooni matazi ines. Ve tighita tamtamon eta muul mako. Yesu zigani ta ileep tomani zi.

⁹ Yes tipul loloz, ve saawe tau tilaghlaagh tizila, Yesu ingalsekin zi ariaaŋ ighe gabua tau tighita izi loloz daaba na, tivotia pa tamtamon rekia sov. Igheen toozi mon le saawe tau Tamtamon Naatu iburig pa mateegh, mako tisavia.

¹⁰ Tauvene gabua tana igheen to tauzi mon. Ve tigham ŋgar naol pa saveeŋ tau Yesu isavia pa burigiin tooni tigha: “Saveeŋ tane, puughu mindai?”

*Mbiwa to Yesu tighasoni pa muleeŋ to propet Ilia
(Mt 17:10-13)*

* **9:7:** Igham 40:34+; Mt 3:17; 2Pe 1:17+

11 Ra mbiwa tooni tighasoni tigde: “Puughu mindai ta yes ngara to tutuun tigde propet Ilia aat imuul ilam imin maata, o Mesia tauu ilam?” *

12-13 Yesu iyol ghasoniin toozi ighe: “Saveen toozi tana, ene iduduun. Ilia aat ilam imin maata, ve igharaat mulin gabua naol tau isaghat ne. Ve yau nasaav payam: Ilia, i ilam wa. †

Ve matamim ingal ngar tau tamtamom tigham pani na. Yes tighur patanani naol pani irau tauzi lolozi itaghon saveen munngaana tau igheen pataghaan na. Ve ighe tauvene, pale mindai pa Maaron aliiņa tau tiboode injarui Tamtamom Naatu na? Saveen tana isaav tauvene: I aat ibaad patanani naol itaghon Maaron ngar tooni, ve yavyavuun tiina ighamu, ve tamtamom tivelegi ve tizori.” *

*Yesu iziir avuvu saghati pa neer marani ee
(Mt 17:14-21; Lu 9:37-42)*

14 Yesu tomania mbiwa tooni tol tana timuul tila tivot to zetazņa siriv, ve tighita eval tiina tila tilivutin zi. Zeran ngara siriv to tutuun tileep tomani zi paam, ve yesņa tivavazorai zi pa savsaveen.

15 Eval tiina tawe tighita Yesu, le tisoov tirur tiina, ve rekia mon tilaan njaruini tila, ve tighamu toman lolozi poia.

16 Yesu ighason zi ighe: “Yamņa zeran tane avazorai gham pa saa?”

17 Neer ee tau ileep ila eval tiina tana lolozi na, iyol ghasoniin to Yesu ighe: “Mos puughu, avuvu

* **9:11:** Mal 4:5; Mt 11:14 † **9:12-13:** Yesu isavia neer rughuzaanja Yoan. Pasaa, uraat siriv to Yoan, ene raraate imin uraat tau muun Ilia ighamu na. * **9:12-13:** Mbo 22:1+; Is 53:3; Lu 1:17

saghati izeev natug tane ve ighamu aavo ivool. Tauta naghamu ilam payo leso uule.

¹⁸ Saawe isov tau avuvu saghati izaa pani, ene isiki izila taan, ve liivo kikikia, ambeera izizi, ve tuua ipardaŋaŋ. Tauvene naghason mbiwa tsio naghe tiziir avuvu saghati tane ighau pani. Eemon titooova, le tirao mako.”

¹⁹ Yesu ilooŋ saveeŋ tane, ve isaav pazi ighe: “Oyai, yam tamtamon to aazne aghur ila mako kat. Itiŋa takaria lepoogh wa. Tauvene naghe pa ŋgar tsiam ivot ve aghilaal rig. Eemon mako. Monmon yam aghamgham patani payau. Pale ŋeez o namariau? Poia, agham ŋeer marani tana ilam.”

²⁰ Tauvene tighamu ila tooni. Saawe tau avuvu saghati tawe ighita Yesu, rekia mon izaa pa ŋeer marani le itap izi taan, ve itatambul toman tuua ipardaŋaŋ, ve ambeera izizi.

²¹ Tauvene Yesu ighason taama ighe: “Patanani tane ighamu alok wa, ma ŋgarig gha ighamu?”

Taama iyol aliŋa ighe: “Saawe tau i kukua geeg ve ilam, gabua tane ighamghamu.

²² Gabua tane, poia mako. Ighe le ivaghamunia kat. Saawe naol, ighamu itaptap izala yav. Ve saawe siriv, ighamu itap izila yaa loolo. Tauvene isaav ighe yo urao, o lolom isaghatin ghei, ve uul ghei.”

²³ Yesu isaav pani ighe: “Wai, mindai ta yo usaav ughe: ‘Isaav ighe yo urao, o uul ghei.’ Ene ighen ila ghuruuŋ ila tsio mon. Tamtamon tau ighe ighur ila, ene aat gabua eta ikeeka mako.” *

* **9:23:** Mk 11:23; Yo 11:40

²⁴ Tauvene ñeer marani taama rekia mon ve itañ rarai Yesu ighe: “Yau naghur ila. Eemon ghuruun ila tsiau, ene irao mako. Uul ghau lak!”

²⁵ Yesu ighita eval tiina tilaan tin̄arui zi tilam, tauvene iyaon avuvu saghati tana, ve iziire ighe: “Yo tau uvaghamunia ñeer marani tane gha aavo ivool ve taliña ipam na, yau nasaav payo: Upuli ve ughau ula! Uzeeva muul sov!”

²⁶ Isaav tauvene, ve avuvu saghati iyak saghat, ve ivatoktokin ñeer marani gha itap izi taan. Ra ipuli, ve ighau. Saawe tau ipuli, ñeer marani maata ililiit ve ivamatmaat. Tauvene eval tiina tighita ve tighē: “Waii, a imaat wa!”

²⁷ Eemon Yesu ikis niima, ve iiti iburig iyooz.

²⁸ Ra Yesu imuul ila pa ruum. Yesña mbiwa tooni mon tilepleep, ve tighasoni tighē: “Puughu mindai ta yei irau niziir avuvu saghati tawe mako?”

²⁹ Yesu iyol ghasoniin̄ toozi ighe: “Tasuñ, o irau taziir gabua tauvene. Eez ite paam mako.”

*Yesu isaav muul pa mateegh ve burigiin̄ tooni
(Mt 17:22-23; Lu 9:43-45)*

³⁰⁻³¹ Yesu tomania mbiwa tooni tipul nugh tawe, ve timbut taan sirivu to Galilaia. Yes tilaagh imin yon̄gaan, leso tamtamon tiwatagh laghoon̄ toozi sov. Pasaa, Yesu ighe ipaghazon̄ai mbiwa tooni mon pa ñgar tau pale ivot pani. I isaav pazi ighe: “Tamtamon Naatu, pale tighuru ila koin̄ja nimazi, leso tiravu imaat. Eemon mboñ imin tol, i aat iburig pa mateegh.”

³² Mbiwa tooni tiloon̄ saveen̄ tane, ve tikankaan pa puughu. Eemon tiroi pa ghasoniin̄ Yesu.

Sei ta eeza tiina kat?
(Mt 18:1-5; Lu 9:46-48)

³³ Yes tilaagh tila tivot Kapernaum ve tilonj tila ruum loolo, ra Yesu ighason mbiwa tooni ighē: “Laak, saawe tau talaghlaagh taghon eez talam, yam avasavo gham pa saa?”

³⁴ Yes tineneej mon. Pasaa, tivasavo zi pa toozi sei ta eeza tiina iliiv zi tisov.

³⁵ Tauvene Yesu mboole izi, ve ipoi mbiwa tooni sanjavul ve ru tilam, ve isaav pazi ighē: “Tamtamon tau ighē eeza imin tiina iliiv zeetja tisov, i aat itatan tauu eeza izi kat imin yes tau lezi ezazi mako na, ve ibees pa tamtamon tisov.” *

³⁶ Ra Yesu igham neer marani ee, ipayooze ila sosozi, ra iiti izaa ibaado, ve isaav pa mbiwa tooni muul ighē:

³⁷ “Isaav ighē tamtamon eta maata ingal ghau, ve igham marani eta tauvene, ve iuule pa yau ezag, ene i igham ghau paam. Ve isaav ighē tamtamon eta igham ghau, ene igham zigau mako. I igham Tamanj Maaron tau imbaanj ghau nalam ne paam.” *

Tamtamon tau ighē ighur koi pait mako, ene imin etaan
(Lu 9:49-50)

³⁸ Yoan iburig ve isaav pa Yesu ighē: “Padudunjaan, yei nighita neer ee izirziir avuvu sasaghati ila yo ezam. Eemon i itaghon ghiit pa lupuunj toit tane mako. Tauvene yei ningalsekini nighe igham tauvene sov.”

* **9:35:** Mt 20:26, 23:11; Mk 10:43+ * **9:37:** Mt 10:40; Yo 13:20

³⁹ Eemon Yesu isaav pazi ighe: “Ai, yam agham vene sov! Pa tamtamon tau ighe igham gabua ngereeta tiina eta pa yau ezag, ene i irau rekia mon itoor ngar tooni, ve isavia saveen saghati payau ne mako. *

⁴⁰ Aloonj. Tamtamon tau ighe ighur koi pait mako, ene i imin etaan ve irau iuul ghiit. *

⁴¹ Onoon kat, yau nasaav payam: Isaav ighe tamtamon eta maata ingal ighe yam tamtamon to Krisi, ve igham lemim yaa rigta ila rubruub to aghun, ene irau Maaron loolo iveegh pani mako. I aat igham tamtamon tana le atuya poia.” *

*Tagham zetaanja titap pa ghuruunj ila toozi sov
(Mt 18:6-9; Lu 17:1-2)*

⁴² Yesu isaav muul ighe: “Yes gegeu tau tighur ilam tsiau ne, isaav ighe tamtamon eta iwat toozi eta, ve ighamu itap pa ghuruunj ila tooni, ene i ikaria tauu wa. Tamtamon tauvene, poia to timbit maet tiina ila luua, ve tipazalia izila te loolo gha ilale.

⁴³⁻⁴⁴ “Isaav ighe nimam ee ighegherev ghom pa ghamuunj solor, na poia to urav motini, ve usiki ilale. Onoon, yo pale umin narape. Eemon murei, yo pale ulonj ula nugh sambam, ve uleep matam yaryaare. Pa ighe nimam ru tigheen, ene pale unoknok ghamuunj solor, ve saawe to Mbonj Murei, aat tisik ghom uzila nugh saghati tau yav ighanghan pani irau saawe. Yav tawe, irau imaat mako. *

* **9:39:** 1Kor 12:3 * **9:40:** Mt 12:30; Lu 11:23 * **9:41:** Mt 10:42

* **9:43-44:** Mt 5:30

45-46 “Ve isaav ighe aghem ee ighegherev ghom pa ghamuuj sosor, na poia to urav motini, ve usiki ilale. Onoon, yo pale umin narape. Eemon murei, yo pale ulonj ula nugh sambam, ve uleep matam yaryaare. Ve ighe aghem ru tigheen, ene pale unoknok ghamuuj sosor, ve saawe to Mbonj Murei, aat tisik ghom uzila nugh saghati tau yav ighanghan pani irau saawe.

47 “Ve matam tauvene paam. Isaav ighe matam ee ighegherev ghom pa ghamuuj sosor, na poia to upeii ve usiki ilale. Onoon, yo pale matam piind ee. Eemon murei, yo pale ulonj ula uleep Maaron nugh tooni. Ve ighe matam ru tigheen, ene pale unoknok ghamuuj sosor, ve saawe to Mbonj Murei, aat tisik ghom uzila nugh saghati tau yav ighanghan pani. *

48 Motmoot to nugh tawe timatmaat mako. Tighanghan tamtamon irau saawe. Ve yav to nugh tawe paam. Irau tirav matini mako. Ighanghan irau saawe. *

49 “Yes to watoonrau tighurghur te izala watoonrau paavo, leso ingalaanj ila Maaron maata. Mako yav ighani. Ngar tauvene pale ivot pa tamtamon tisov. ‡ *

50 “Te, §

* **9:47:** Mt 5:29 * **9:48:** Is 66:24 ‡ **9:49:** Muuj, Maaron isaav pa yes Israela ighe tighur te (o sol) izala watoonrau toozi imin ilaal pa saveenj mbuaan tooni (Wok Pris 2:13). Yav imin ilaal pa: 1) atuya tau Maaron pale ighuru pa tamtamon pa Mbonj Murei, 2) uraat to Avuvu Patabuyaan, ve 3) patanjani maata maata tau itoov ghuruuj ila toit, ve igham ghiit tagharaat tauun, leso tanjalaanj ila Maaron maata. * **9:49:** Ezek 43:24 § **9:50:** Paesiinj to saveenj ziiri tane igheen ila Mt 5:13.

ene gabua poia. Eemon isaav ighe tapiri isov, ve tetei muul mako, ene pale tagharaata mindai? Mako. Yam irau amin te poia, ve atotoi ngar luuma to Maaron pa tamtamon. Leso yamña avalupu gham amin eemon, ve aleep poi.” *

10

Saveeņ to ravuunj motin vainj (Mt 19:1-12; Lu 16:18)

¹ Yesu iburig muul, ipul nugh tawe, ve ilaagh ila ivot taan sirivu to Yudea tau igheen ila pa yaa Yordan ziige ite. Ilepleep ta sewe, ve eval tiina timeke tila tooni muul. Tauvene i ipaghazonai zi muul pa Maaron aliina itaghon ngar tau monmon ighamghamu na.

² Zeran tutuunja siriv tila tooni tigde titoova. Tauvene tighasoni tigde: “Mindai? Isaav ighe tamoot eta irav motin vainj tooni, ve iziir azaawa, ene iduduun pa tutuunj toit, ma mako?”

³ Yesu ighason zi ighe: “Tutuunj tau Mose ighuru payam na, isaav mindai?”

⁴ Yes tiyol aliina tigde: “Mose iyok ighe zitamoot irau tirav motin vainj toozi. Eemon isaav ighe tamoot eta ighe iziir azaawa, i aat ibood livaa le rau eta imin paesiin, lesu ipaghazonai zi ighe vainj toozi isov wa. Mako iziire ila.” *

⁵ Yesu isaav pazi muul ighe: “Saveeņ tsiam tana, ene onoon. Ve Mose ibood tutuunj tauvene payam pasaa, ngar saghati iyaryaan kat ila lolomim.

* **9:50:** Mt 5:13; Lu 14:34+; Ro 12:18 * **10:4:** Lo 24:1+; Mt 5:31

⁶ Eemon indeeᅇ saawe imin maata kat tau Maaron ighur sambam ve taan na, i ighur tamtamon. Ighur tamoot ve livaa. *

⁷ Puughu tane ta tamoot eta ighe ivai, i aat ipul taama gha tiina, ve yesuru azaawa tilup zi timin eemon.*

⁸ Muuᅇ, yesuru tileep lez lez. Ve saawe to tivai, timin tamtamon eemon. Tauvene yesuru irau tileep lez lez muul mako. Pa tivalupu zi timin eemõn wa.

⁹ Ve yes tau Maaron tauu ilup zi timin eemon na, tamtamon eta ivalagh zi muul sov.”

¹⁰ Yesu tomania mbiwa tooni timuul tila ruum, ra tighasoni muul pa saveeᅇ tana.

¹¹ Yesu isaav pazi tauvene: “Isaav ighe tamoot eta irav motin vaiᅇ tooni, ve ivai livaa paaghu, ene imalaan pa tutuuᅇ to vaiᅇ, ve igham sosor pa azaawa muᅇgaana.

¹² Ve livaa tauvene paam. Isaav ighe irav motin vaiᅇ tooni, ve ivai tamoot paaghu, ene i imalaan pa tutuuᅇ to vaiᅇ.” *

*Yesu ipalot yes geegeu
(Mt 19:13-15; Lu 18:15-17)*

¹³ Tamtamon tighamgham natuzᅇa tila to Yesu, leso ighur niima izala pavozi ve ipalot zi. Eemon mbiwa tooni tighit zi, ve tiyaon zi.

¹⁴ Yesu ighita ᅇgar tau tighamu na, le irau loolo mako. Tauvene isaav pazi ighe: “Ai, yam apoon eez pa geegeu sov. Apul zi tilam payau. Pa pooz

* **10:6:** Gnp 1:27, 5:2 * **10:7:** Gnp 2:24; Ep 5:31 * **10:12:** Mt 5:32; 1Kor 7:10+

to Maaron tomania nugh tooni, ene to yes tau ngar toozi imin geegeu tane. * *

¹⁵ Yau nasaav payam kat: Isaav ighe tamtamon eta itaghon pooz to Maaron ngara imin geegeu tane mako, i aat irau ilonj ila nugh tooni ne mako.” *

¹⁶ Yesu isavsaav le isov, ra igham yes geegeu tawe, ibaad zi, ve niima izala pavozi, ve ighur poia to Maaron iza toozi.

*Kuaz tauu ee isavsaav tomania Yesu
(Mt 19:16-30; Lu 18:18-30)*

¹⁷ Yesu ighe ipaburigin laghoonj tooni muul. Eemon neer ee ilaan naruini ila, iput aaghe izi Yesu naagho, ve ighasoni ighe: “Mos puughu, yo poiam. Pale naghama mindai, leso naleep matag yaryaare le alok?” *

¹⁸ Yesu iyol ghasoniinj tooni ighe: “Puughu mindai ta yo ughe yau poiag? Maaron mon ta poia. Ite paam mako.

¹⁹ Tutuunj ta naol ne, yo uwatagh zi wa: ‘Urav tamtamon imaat sov, ughur boog sov, uum sov, upariaanj saveenj karom sov, uvatombanoi tamtamon to uum gabua toozi sov, ve matam lonjonjai pa tamam gha tinam, ve utandagh pazi.’ ” *

²⁰ Neer tawe iloonj saveenj tane, ve isaav pa Yesu muul ighe: “Wai, mos puughu, saawe tau kukuag ve ilam aazne, yau nataghoonir tutuunj tana tisov.”

* **10:14:** Geegeu tinumeer tamazna ve tinazna ve tileep ila sambazi. Iit paam irau tanumeer Maaron ve tileep ila i saamba. Leso tataghon pooz tooni, ve murei talonj tala nugh sambam. * **10:14:**

1Kor 14:20; 1Pe 2:2 * **10:15:** Mt 18:3 * **10:17:** Mbanj 16:30

* **10:19:** Igham 20:12+; Lo 5:16+; Ro 13:9

²¹ Yesu ighita neer tana le loolo pani. Tauvene isaav pani muul ighe: “Poia. Ve ngar ee ta yo ughamu soone. Ula ugholia gabua tsio tisov, ve urei maeta pa yes mbolaana, leso ugham lem kuaz tauu izi nugh sambam. Le isov, o ulam utaghon ghau.” *

²² Neer tana iloon saveen tane, ve iburig, ipul Yesu ve ila toman loolo ipatanan. Pasaa, i kuaz tauu kat.

²³ Ra Yesu itoor ghi maata ila pa mbiwa tooni, ve isaav pazi ighe: “Yes kuaz tauņa, ipatanan pazi kat to titaghon pooz to Maaron ve tilon tila nugh tooni.” *

²⁴ Mbiwa tooni tiloon saveen tane le tirur pani. Tauvene Yesu isaav pazi muul ighe: “Aa geegeu tsiau, ipatanan kat pa tamtamon to titaghon pooz to Maaron ve tilon tila nugh tooni!”

²⁵ Aghita. Isaav ighe kamel eta itoova to izeev ghi ilon ila sarum puura, pale irao? Ene aat mako. Ve yes kuaz tauņa tauvene paam. Isaav ighe tauzi titoova to titaghon pooz to Maaron ve tilon tila nugh tooni, ene pale tirao mako kat.”

²⁶ Mbiwa tooni tiloon saveen tane le tirur tiina ve ngar toozi imbool. Tauvene tighasoni tigde: “Wai, ighe tauvene, sei ta pale Maaron igham mulini ve ileep poi izi nugh tooni?”

²⁷ Yesu maata ila pazi, ve isaav tauvene: “Isaav ighe tamtamon tauzi titoova, ene aat tirao mako. Eemon Maaron, gabua eta irau ikeeka mako. Tauvene isaav ighe i igham mulin zi, ene pale tileep poi.”

* **10:21:** Mbanj 2:45, 4:32+; 1Tim 6:17+

* **10:23:** Mk 4:19; 1Tim 6:9+

²⁸ Yesu isaav tauvene, ve Petrus iyol aliinja ighe: “Ughita. Yei tane nipul gabua tsiei naol isov izi ileple, ve nilam nitaghon ghom.”

²⁹ Yesu iyol aliinja ighe: “Onoon kat, yau nasaav payam. Isaav ighe tamtamon eta igham ngar payau tomania vaaru poia, ve ipul ruum tooni, tonvetaz tooni, tiina taama, natja, ma uum tooni,

³⁰ ene pale poia tiina to Maaron izaa tooni le iyol gabua tisov tau tamtamon tana ipul zi na irau ndinndin ee (100). Pasaa, saawe tau i ileep izi taan, Maaron pale igham le ruum, tonvetaz, natja, tiinja, ve uum katini. Eemon tamtamon pale tighur patajani pa tamtamon tana paam pasaa, i itaghon ghau ve ivotia varug. Ve saawe to Mbon Murei ighe ivot, i pale ileep maata yaryaare le alok.

³¹ “Eemon tamtamon katini tau aazne timunmuun, ene pale tizi tileep murei geeg. Ve yes tau aazne tileep murei geeg, ene pale anazi tila timuun.” *

*Yesu isaav muul pa mateegh ve burigiin tooni
(Mt 20:17-19; Lu 18:31-34)*

³² Yesu tomania mbiwa tooni tilaagh taghon eez tau ila pa Yerusalem. Yesu imuun, ve yes titaghoni. Mbiwa tooni ngar toozi ivaghamgham. Ve yes tau tilaagh tomani zi na, roin igham zi. Yesu igham mbiwa tooni sanjavul ve ru tila soghan, ra isaav pazi muul pa gabua tau pale ivot pani.

³³ Ighe: “Aloon. Iit taghe tala pa Yerusalem tane. Tala tavot, pale tighur Tamtamon Naatu ila daaba to watoonrau tomania yes ngara to tutuun

* **10:31:** Mt 20:16; Lu 13:30

nimazi itaghon Maaron n̄gar tooni. Ve yes pale tipayooze pa savsaveen̄, ve tighur atuya pani tige i aat imaat. Mako tighuru ila yes tau Yuda mako na nimazi.

³⁴ Ve anazi tipañizaini, tiñazuvu, ve tilosi pa waar tuatua, ra tiravu imaat. Eemon mbon̄ imin tol, i pale iburig pa mateegh.”

Yakobus ve Yoan tige timin tintiina
(Mt 20:20-28)

³⁵ Yesu isavia mateegh tooni le isov, ra Zebedi nat̄a ru, Yakobus gha Yoan, tila tigharau Yesu, ve tisaav pani tige: “Paduduñaañ, gabua ee ta yeiru lolomai pani kat. Tauvene nighe nighason ghom pani. Irau ugham payei?”

³⁶ Tauvene Yesu ighason zi ighe: “Yamru aghe yau naghm saa payam?”

³⁷ Yesuru tiyol aliñ̄a tige: “Yei nighe murei, saawe tau uleep toman mbonarim tiina izi nugh sambam, na ugham ghei nileep ila yo zigem. Ee ileep ila pa nimam tapir, ve ite ileep ila pa ñas.”

³⁸ Yesu iyol aliñ̄azi ighe: “Gabua tau yamru aghason ghau pani na, yam awatagh patañani tooni mako. Aghita. Rubruub † tau yau aat naghun ila ne, yamru irau aghun ila paam? Ve patañani tiina tau pale igham ghau ne, yamru irau aghamu paam?” *

³⁹ Yesuru tiyol aliñ̄a tige: “Vee, yeiru irau nighun ila.”

† **10:38:** Rubruub tau Yesu isavia, ene iza a to patañani tau i pale ibaado, leso ireu sosor to tamtamon, ve itatan Maaron aatyavyav tooni. * **10:38:** Mk 14:36; Lu 12:50

Tauvene Yesu isaav pazi muul ighe: “Onoon, rubruub tau yau aat naghun ila, yamru pale aghun ila paam. Ve patanani tau yau aat naghamu, ene pale igham yamru paam. *

⁴⁰ Eemon gabua tau yamru aghason ghau pani na, yau nangini mako. Ene igheen to Tamañ Maaron. Sei ta pale ileep pa nimag tapir, ve sei ta pale ileep pa ñas, ene i tauu ighur zi pataghaañ wa.”

⁴¹ Zetazña sañavul tiloon Jakobus yesuru Yoan saveeñ toozi, le irau lolozi mako.

⁴² Tauvene Yesu ipoi zi tilam, ve isaav pazi ighe: “Ngar to nugh nugh tau Yuda mako na, yam awataghi wa. Yes daaba tau tinginñgin zi na, tipapait tauzi ezazi, ve titatan yes tau tileep ila sambazi. Ve tamtamon toozi siriv tau ezazi tintiina na, titaghon ñgar raraate mon. Saawe naol, titotoi tapirizi pa yes tau tileep ila sambazi na, ve titatan zi. *

⁴³ Eemon ñgar tauvene igheen tsiam sov. Isaav ighe tsiam eta ighe eeza imin tiina ila yam so-somim, na i aat itatan tauu eeza, ve imin besoonja payam. *

⁴⁴ Ve isaav ighe tsiam eta ighe imuun pa yam asov, na i aat itatan tauu eeza izi kat le imin besoonja sorok pa tamtamon tisov. *

⁴⁵ Leso itaghon Tamtamon Naatu ñgar tooni. Pa i ilam to tamtamon tibeas pani ne mako. I ilam imin besoonja to iuul tamtamon, ve iyoki tauu gha imaat pa tamtamon katini. Leso ighol atuya to

* **10:39:** Mbanj 12:2; Pil 3:10; Syg 1:9 * **10:42:** Lu 22:25+

* **10:43:** Mt 23:11; Mk 9:35; Lu 9:48 * **10:44:** 1Pe 5:3

sosor toozi, ve ipas zi pa saghati tapiri.” *

Yesu igharaat neer maata kumkuuma ee igharau Yeriko

(Mt 20:29-34; Lu 18:35-43)

⁴⁶ Yesu tomania mbiwa tooni tila tivot nugh Yeriko. Ra tisakia laghoonj toozi muul, ve yesna eval tiina tipul nugh, ve tilaagh tila le tizaa to neer maata kumkuuma ee, eeza Bartimeus. I Timeus naatu. Mboole izi eez ziige ve isunjsunj tamtamon pa le gabua.

⁴⁷ I iloonj tighe neer tau ilam ne, i Yesu to Nasaret. Tauvene iboob aliinja tiina ighe: “Aa Yesu, David Naatu, lolom isaghatin ghau ve uul ghau lak!”

⁴⁸ Tamtamon katini tiloonja, ve tiyaoni tigde ineenen. Eemon mako. I itan rarai Yesu muul toman aliinja tiina kat ighe: “O David Naatu, lolom raa, isaghatin ghau ve uul ghau lak!”

⁴⁹ Tauvene Yesu iyooz, ve isaav ila pa tamtamon siriv ighe: “Asaav pani ilam.”

Tauvene tipoi maata kumkuuma tawe tigde: “Aa, lolom poia, ve uburig. Pa i ipoi ghom ighe ula tooni.”

⁵⁰ Neer tana itir nonoghiinja tooni malaua izi, ve iburig gha ila to Yesu.

⁵¹ Ila ivot, ra Yesu ighasoni ighe: “Aiyo, ughenagh mindai payo?”

Maata kumkuuma tana iyol aliinja ighe: “Aa mos puughu, yau naghe yo ugharaat matag. Leso naghita nugh.”

⁵² Tauvene Yesu isaav pani ighe: “Ula lak! Ghu-ruunj ila tsio, tauta iuul ghom gha matam poia wa.”

* **10:45:** Yo 13:14; Pil 2:7; 1Tim 2:5+

Rekia mon neer tana maata poia gha ighita nugh. Ra itaghon Yesu ve yesna tilaagh taghon eez gha tila. *

11

Yesu izala pa Yerusalem

(Mt 21:1-11; Lu 19:28-40; Yo 12:12-19)

¹ Yesu tomania mbiwa tooni tilaagh tila le tigharau Yerusalem, ve tivot nugh ru, Betpage ve Betania, tau tighen ila loloz Oliv ziige. Ra Yesu imbaan mbiwa tooni ru ighe:

² “Yamru amuun azala nugh tawe. Ala avot, pale aghita donki paaghu ee tau timbitu iyozyooz. Neer eta mboole izala paavo pai eta soone. Apoola, ve aghamu izilam.

³ Isaav ighe tamtamon eta ighason gham ighe: ‘Puughu mindai ta yamru agham tauvene?’ o asaav pani aghe: ‘Tiina tsiei le uraat pani. I pale rekia mon ve ipamuule ilat.’ ”

⁴ Tauvene yesuru timuun tila tivot nugh tawe, ve tighita donki paaghu ee iyozyooz. Donki tawe, timbitu ila eez ziige igharau ataman to ruum ee. Yesuru tipoola,

⁵ ve zeran siriv tau tiyozyooz ta sewe tighason zi tigha: “Ai, yamru agham saa? Puughu mindai ta apool sorokin donki tana?”

⁶ Yesuru tiyol alinazi imin tau Yesu isaav pazi. Ra zeran tawe tiyokia donki tana pazi,

⁷ ve yesuru tighamu, ve timuul tizila pa Yesu. Tila tivot tooni, ra tizuum nonoghiina toozi to

* **10:52:** Mt 9:22; Mk 5:34

ngoaaŋ izi, titir zi izala doŋki paavo, ve Yesu izala ve mboole izi.

⁸ Ra eval tiina tau tilaagh tomani zi na, tizavar nonoghiinja toozi to ngoaaŋ taghon eez to tipakuru. Ve tamtamon siriv tila timbut gabua imin tuum raua itaghon eez ziige, ve tigham zi tilam tisik zi taghon eez paam.

⁹ Ve tamtamon siriv timuun pa Yesu, ve siriv tilaagh murei, ve tipaiti toman aliŋazi tiina tigue:

“Hosana! *

Neer tane ilam pa Neer Tiina eeza.

Poia to Maaron aat iza a tooni ve ipaloti! *

¹⁰ Tamtamon tau aazne ilam ne, pale imin kinik, ve igham pooz imin muun timbuun David ighamu.

Poia to Maaron aat iza a tooni ve ipaloti.

Hosana! Tapait Maaron tau ileep saanja le saanja kat na eeza!”

¹¹ Yesu ila ivot Yerusalem, ra ilon ila sirsiir to Rumei Tiina loolo. Iyozyoos ta sewe, ve maata ilala pa gabua, ve ighita ngar naol tau tamtamon tighamgham zi ila rumei loolo. Eemon igharau ighe mboŋ izi. Tauvene yesŋa mbiwa tooni saŋavul ve ru tipul Yerusalem, ve timuul tila pa nugh Betania.

Yesu isaav ve ai fik igorgor

(Mt 21:18-19)

¹² Mboŋ nughizau, ra Yesu tomania mbiwa tooni tiburig gha tipul nugh Betania, ve tigue

* **11:9:** ‘Hosana’, ene saveeŋ ziiri ee to yes Israela. Puughu tauvene: ‘ugham mulin’ o ‘uul.’ Isaav ighe tiyoor neer eta eeza, ene tibobai saveeŋ tane to tipakuru. * **11:9:** Mbo 118:25+

timuul tila pa Yerusalem. Tilaghlaagh taghon eez tila, ve Yesu iyamaan ghi ighe i pitoola.

¹³ Maata ila le ighita ai fik ee iyooz soghan. Tauvene inaruini ila ighe igham anoonja siriv gha ighan. Eemon ila le ighita ai tawe le anoonja eta mako. Raua mon. Pasaa, saawe tana, ene saawe to ai fik tyanooj soone.

¹⁴ Tauvene isaav pa ai tana ighe: “Aazne ve ila, yo aat anojam muul to tamtamon tighani ne mako.” *

Yesu isavia saveeņ tane, ve mbiwa tooni tiloonja paam.

Yesu iziir tamtamon to raukoliņ tighau pa Rumei Tiina

(Mt 21:12-17; Lu 19:45-48; Yo 2:13-22)

¹⁵ Yesu tomania mbiwa tooni tila tivot Yerusalem, ra Yesu ilonj ila sirsiir to Rumei Tiina loolo, le ighita tamtamon tiraraukol ta sewe. Tauvene ighe iziir zi tighau tivot tila pa muuri. I itoor boor to yes zeran to paravoliaaņ maet, tomania paņ to yes tau tiraraukol pa man mbuun na, le saveeņ mariņ toozi iparņgiriiz izi taan.

¹⁶ Ve yes tau tibatbaad gabua toozi, ve tilala tilamlam ila sirsiir loolo to Rumei Tiina na, i inġalsekin zi ighe tigham tauvene muul sov.

¹⁷ Ra ipaghazonjai zi pa Maaron aliinja ighe: “Yam awatagh mako? Maaron aliinja tau tiboode na isaav ighe:

‘Pale tiwaat rumei tsiau tigde ‘suņuun niia to nughmariņ.’

* **11:14:** Lu 13:6

Eemon yam aghamu imin nugh tau umbuunja tiyonjooŋ ila.’ ” *

¹⁸ Yes daaba to watoonrau tomania yes ngara to tutuunj tiloonj saveenj tane, ve tiburig gha tiil eez pa ravuunj Yesu imaat. Pasaa, eval tiina tirur pa saveenj tooni ve titaghoni wa. Tauvene yes daaba tiroi pani.

¹⁹ Ravrav izi, ra Yesu tomania mbiwa tooni tipul Yerusalem, ve tivot tila.

Ghuruunj ila toit, tapiri tiina
(Mt 21:20-22)

²⁰ Nughizau, ra Yesu tomania mbiwa tooni tiburig gha tilaagh taghon eez muul tila. Tila le tighita ai fik tau Yesu isavia saveenj patanjani injaruini na, igorgor izala ta unduuva ve izila waria paam.

²¹ Tauvene Petrus maata ingal Yesu aliinja, ve isaav pani ighe: “Padudunjaan, ughita! Ai fik tau noor usavia saveenj patanjani injaruini na, igorgor wa!”

²²⁻²³ Yesu iyol Petrus aliinja, ve isaav pazi ighe: “Yam irau aghur ila to Maaron. Yau nasaav payam kat: Isaav ighe tamtamon eta isaav pa loloz tane ighe: ‘Uburig, ve usik taum ula te.’ Ve ighe loolo ru mako, ve ighur ila ighe saveenj tooni pale ighur anooja, ene pale Maaron igham gabua tana ivot.
*

²⁴ Tauvene yau nasaav payam. Isaav ighe yam aghason Maaron pa gabua eta, ve aghur ila aghe

* **11:17:** Is 56:7; Yer 7:11 * **11:22-23:** Mt 17:20; Lu 17:6

i pale igham gabua tana ivot, i aat ighamu ivot payam.*

²⁵ “Isaav ighes yam ayooz pa sunuun, ve lemim patanjani tomania etamim eta, na apul sosor tooni tana. Le isov o asun. Leso Tamamim tau ileep sambam we, ireu sosor tsiam paam.*

²⁶ [Eemon isaav ighes yam apul sosor to zeetmimnja mako, ene aat sosor tsiam paam, Tamamim tau ileep sambam we, ireua mako.]”

Yes daaba tighason Yesu pa sei ta ighuru pa uraat tooni

(Mt 21:23-27; Lu 20:1-8)

²⁷ Yesu tomania mbiwa tooni tila tivot Yerusalem muul, ve Yesu ilonj ila sirsiir to Rumei Tiina loolo, ve ilaghlaagh ta sewe. Yes daaba to watoonrau tomania ngara siriv to tutuun ve pooza siriv tilup zi ve tila tivot tooni, ve tighasoni tighes:

²⁸ “Laak, uraat tau yo ughamghamu na, yo ezam pani mindai? Ve sei kat ta ighur ghom pa uraat tane?” *

²⁹ Yesu iyol aliñazi ighes: “Ghasoniin tsiam poia. Eemon yau leg ghasoniin ee payam paam. Isaav ighes ayol ghasoniin tsiau, ene aat yau nayol tsiam paam, ve navotia puughu ta yau ezag pa uraat tsiau.

³⁰ Aiyo, asaav payau. Yoan tau muun irurughuuz tamtamon na, uraat tooni puughu mindai? I itaghon ngar to nugh sambam, ma itaghon ngar to tamtamon?”

* **11:24:** Yo 14:13; Yems 1:5+

* **11:25:** Mt 5:23, 6:14+; Kol 3:13

* **11:28:** Yo 2:18; Mbanj 4:7

³¹ Yes tiyol aliinja rekia mako. Tivasavo zi tighe: “Wai, ene pale tasaav mindai? Ighe tasaav taghe: ‘Yoan itaghon ngar to nugh sambam,’ i pale isaav pait: ‘Ighe tauvene, puughu mindai ta yam aghur ila saveen tooni mako?’

³²⁻³³ Ve ighe tasaav taghe: ‘Yoan itaghon ngar to tamtamon,’ pale poia?” Tisaav tauvene pasaa, tamtamon tisov tighur ila tigde Yoan i propet tauu. Tauvene yes tiroi, ve tiyol ghasoniinj to Yesu tigde: “Ii, yei nikankaan pani.”

Tauta Yesu aana isaav pazi: “Ighe tauvene, yau paam, aat irau nayol ghasoniinj tsiam, ve navotia puughu tau yau ezag pa uraat tsiau tane ne mako.”

12

Saveen palelaan to uraata sasaghatizi tau tingin uum vaen

(Mt 21:33-46; Lu 20:9-19)

¹ Yesu isaav muul pa yes daaba to yes Yuda ila saveen palelaan ighe: “Pai ee, neer ee igharaat taan tooni ve ivazogh vaen ila. *

Mako ikau olol livutini, ve itai puura ee imin nugh to pison vaen, ve irau balbaal aaghe malaua. Leso yes uraata tileep izala saanja, ve matazi ilala pa uum vaen ve tingini. I igharaat gabua naol le isov, ra ipul uum vaen tooni ila uraata siriv nimazi. Leso tigham uratoini, ve saawe to yaun vaen anooja, mako tivalaghi gha sirivu imin i le, ve sirivu imin yes lezi. I igharaat saveen tomani zi le isov, ra iburig, ipul nugh tooni, ve ila ileep malau izi nugh ite. *

* **12:1:** Paesiiinj to saveen ziiri tane igheen ila Mt 21:33.

Mbo 80:8+; Is 5:1+

* **12:1:**

² “Ileep ta sewe le saawe to yaun vaen anoona ivot, ra imbaan besoonja tooni ee ila to yes uraata tawe. Leso igig zi, ve igham vaen anoona siriv tau tighuru pa uum tauna na.

³ Eemon saawe tau besoonja tana ila peria toozi, tikisi ve tilosi. Ra tiziire niima nginaanja, gha imuul ila.

⁴ Tauvene uum tauna imbaan besoonja tooni ite ila. Eemon i paam, tiravu izala daaba, ve tipamayanini.

⁵ Ra uum tauna imbaan besoonja tooni ite imin tol aana ila. I ila ivot toozi, ve tiravu imaat. Ve besoonja tooni siriv, tauvene paam. Tirav siriv le naghozi isaghat, ve siriv, tirav zi timatmaat.

⁶ “Besoonja tooni tisov titoova le mako, ve neer eemon ta ilepleep. Ene i tauu naatu tau i loolo igheen tooni kat. Tauvene imbaan naatu tana ila. Pasaa, igham ngar tauvene: ‘Ighe taug natug ila, ene aat tiroron pani ve tiloon aliinja.’

⁷ Eemon saawe tau yes uraata tana tighita naatu ilaghlaagh soghan gha ilam, tivasavo zi tighe: ‘Ou, aghita! Ewe tiina toit naatu, tauta ilam we. Murei, i pale ighamuur gabua naol isov to taama. Tala taravu imaat. Leso gabua tau i eeza pani ne, taghamu imin leen!’ *

⁸ Tauvene tila gha tikisi, ve tiravu imaat. Ra tisor paata iza, ve tila tisiki ila pa muuri.” *

⁹ Yesu isavia saveen tane le isov, ra ighason zi ighe: “Yam agham ngar mindai? Pale uum vaen tauna igham mindai pa yes uraata tawe? I pale

* 12:7: Mt 27:18 * 12:8: Hib 13:12

ilam ve irav zi tisov timataar, ve ighur uum vaen tooni ila tamtamon siriv nimazi, lesu tingini.” *

10 Ra Yesu isaav pazi muul ighe: “Maaron aliinja ziiri ee tau tiboode na, yam awaato, ma mako? Saveen tawe isaav ighe:

‘Maet tau yes to raonj ruum matazi veleghini, ve tisiki ilale, tauta imin puughu pa ruum iyooz ve ipaloti. Leso ruum iyooz ariiaan izala paavo.

11 Maaron tauu igham ngar tane ivot.

Ve yei nighita imin gabua ngereeta ee ila mata-mai.’ ” *

12 Yes daaba tiloonj saveenj palelaanj tane, ve tighilal tigde Yesu isavia saveenj tane injarui zi. Tauvene tigde tikisi pataghaanj. Eemon tiroi pa eval tiina, tauta tipuli, ve tighau tila.

Ghasoniinj to sikiinj takes ila pa kinik tiina to Rom (Mt 22:15-22; Lu 20:20-26)

13 Murei ra, daaba to yes Yuda timbaanj zeran tutuunja tomania Erod ziijeera siriv tila to Yesu. Yes tigde titombaana pa savsaveenj, ve ighe isik aliinja eta isosor, mako imin puughu pani to tipayooze pa savsaveenj.

14 Tauvene tila tivot tooni, ve tigham saveenj ngoreenj pani tigde: “Mos puughu, yei niwatagh: Yo neer to saveenj onoon mon. Isaav ighe tamtamon ezazi tintiina, ma lezi ezazi mako, na yo ugham ngar pa gabua tauvene mako. Usasavia ngar raraate mon pa tamtamon tisov, ve usavsav ghazonj ila matazi. Ve isaav ighe upaghazonjai tamtamon pa eez to Maaron, na saveenj tsio isov,

* 12:9: Mbanj 13:46, 28:28 * 12:11: Mbo 118:22+

ene onoon mon. Tauvene usaav ghazoon payei. Isaav ighe iit Yuda tasik takes ila pa kinik tiina to Rom, pale iduduun pa tutuun toit, ma mako? Tasik, ma ileple?”

¹⁵ Eemon Yesu iwatagh karom toozi wa. Tauvene isaav pazi ighe: “Puughu mindai ta yam aghe atoov ghau? Maet tau tasiksiki pa takes na, agham eta ilam naghita.”

¹⁶ Tauvene tigham maet denari ee ila tooni, ve ighason zi ighe: “Laak, sei anunu ve eeza tane?”

Yes tiyol ghasoniin tooni tigde: “Ena kinik tiina to Rom.”

¹⁷ Yesu isaav pazi muul ighe: “Tauta ena. Ighe gabua to kinik tiina to Rom, na aghamu imuul ila pa i tauu. Ve gabua to Maaron, o apamuule ila pa Maaron.” †

Yes tiloon saveen tooni tane le tirur pani. *

*Ghasoniin pa burigiin to yes mateegha
(Mt 22:23-33; Lu 20:27-40)*

¹⁸⁻¹⁹ Yes Sadusi tisavsaav tigde yes mateegha irau tiburig mako. Tauvene Sadusi siriv tila to Yesu, ve tighasoni tigde: “Mos puughu, muun Mose ibood tutuun pait tauvene: Ighe neer eta ivai, ve yesuru azaawa lezi natuzi eta mako, ve tamoot imaat, ene aat taazi ivai naar tooni. Leso livaa ipoop, ve natuzi tana iyol taama olman tau imaat na, ve iyooz pa gabua tooni. *

²⁰ “Laak, saawe ee, tonvetaz liim ve ru tilepleep. Neer aidaaba ivai, eemon le naatu mako, ve imaat.

† **12:17:** Paesiin to saveen ziiri tane igheen ila Mt 22:21. * **12:17:** Gnp 1:27; Ro 13:7; 1Pe 2:17 * **12:18-19:** Lo 25:5; Mban 23:8

21 Tauvene taazi tau itaghoni na, igham naar tawe ve ivaii. Eemon taazi tawe paam, le naatu mako, ve imaat. Ra tazizi ite tau imin tol na, ngar raraate ivot pani paam. Le naatu mako, ve imaat.

22 Tighamgham tauvene le yes liim ve ru tivai livaa eemon tana, ve timatmaat le tISOV. Ve lezi natuzŋa mako. Murei ra, naar tana paam, aana imaat.

23 Laak, saawe to Maaron igha ipaburigin yes mateegha, ene pale livaa tawe imin sei kat aza-awa? Pa yes liim ve ru ta tISOV tivaii.”

24 Yesu iyol aliŋazi igha: “Oyai, yam tane awatagh Maaron tapiri ve saveeŋ tooni rigta mako. Tauta ngar tsiam ikau.

25 Saawe to Mboŋ Murei, ve Maaron igha ipaburigin yes mateegha, ene tamtamon irau tivai muul mako. Lepoghazi pale imin yes aŋela tau tileep izi nugh sambam. *

26-27 Aiyo, yau naghe naghason gham pa burigiin to yes mateegha. Mindai, saveeŋ ziiri ee tau Mose iboode na, isavia saawe tau Maaron ivot tooni imin yav ighanghan ila ai marani. Yam awaat saveeŋ tawe, ma mako? Saawe tana, Maaron isaav pani igha:

‘Yau Maaron to Abaram, Maaron to Isak, ve Maaron to Yakop.’ *

“Maaron, i Maaron to yes mateegha mako. I Maaron to yes tau tileep matazi yaryaare. Tauvene ngar tsiam isapir kat.” ‡

* 12:25: 1Kor 15:42-53 * 12:26-27: Igham 3:6; Mbanj 7:32; Hib 11:16 ‡ 12:26-27: Paesiin to saveeŋ ziiri tane igha ila Mt 22:32.

Tutuunɗ sindei ta tiina kat iliiv tutuunɗ tisor?
(Mt 22:34-40; Lu 10:25-28)

²⁸ Neer ɗgara ee to tutuunɗ ilam ve iloonɗ Yesu tomania yes Sadusi tivazorai zi pa savsaveeɗ. I iloonɗ saveeɗ to Yesu, ve ighita ighi Yesu iyol duduɗai ghasoniinɗ toozi. Tauvene aana ighason Yesu ighi: “Tutuunɗ sindei ta tiina kat iliiv tutuunɗ tisor?”

²⁹ Yesu iyol ghasoniinɗ tooni ighi: “Tutuunɗ tau tiina kat iliiv tutuunɗ tisor, ene vene:

‘O yam Israela aloonɗ! Tiina toit Maaron, i mon ta Maaron tauu.’ *

³⁰ Tauvene lolom pa Tiina tsio Maaron. Ughur lolom tomania ɗgar tsio ve tapirim isov ila pani.’ *

³¹ “Ve tutuunɗ tiina ite tau imin ru pani, ene vene: ‘Lolom pa tamtamon ve ugham poghani zi, imin lolom pa taum.’ *

Tutuunɗ eta iliiv tutuunɗ ru tane mako.” *

³² Neer tawe iloonɗ saveeɗ tane, ve isaav pa Yesu ighi: “Mos puughu, saveeɗ tsio, ene iduduunɗ kat. Saveeɗ tau usavia, ene onoon mon. Pasaa, Neer Tiina mon ta Maaron tauu. Maaron ite paam mako.” *

³³ Tauvene isaav ighi iit taghur loloon tomania ɗgar toit ve tapiriin isov ila pani, ve taghur loloon pa tamtamon ve tagham poghani zi imin loloon pa tauun, ene gabua tiina kat. Iliiv gabua naol isov tau taghur zi izala artaal leso yav ighan dodolin zi, tomania watoonɗrau siriv tau taghamgham zi ne.” *

* **12:29:** Lo 6:4+ * **12:30:** Lo 10:12+ * **12:31:** Wkp 19:18

* **12:31:** Ga 5:14; Yems 2:8 * **12:32:** Lo 4:35, 39 * **12:33:** Mbo 40:6-8, 51:16-17; Mt 9:13

34 Yesu ighita ighe ñeer tana iyol saveeñ toman ñgar poia, tauvene isaav pani ighe: “Yo uleep malau pa pooz to Maaron mako.” Saawe tana ve ila, tamtamon tighason Yesu pa saveeñ eta muul mako. Pasaa, tiroi pa saveeñ tooni.

Isaav ighe Mesia ivot ila to kinik David, pale eeza irau iliiv David mindai?

(Mt 22:41-46; Lu 20:41-44)

35 Yesu ipaghazonai tamtamon pa Maaron aliinja ila sirsiir to Rumei Tiina loolo, ve ighason zi ighe: “Laak, puughu mindai ta yes ñgara to tutuun tigde Mesia pale ivot ila to kinik David paaghu tooni?”

36 Pa muun, Avuvu Patabuyaan ipaburigin David, ve isaav tauvene:

‘Maaron isaav pa Tiina tsiau ighe:

“Ulam mbolem izi ila pa nimag tapir,

le irau natatan koiamña ve tapirizi isov kat, ve

uvaghaaz zi ila aghem saamba.” ’ *

37 “Aghita. David tau iwaat Mesia ighaze ‘tiina toni.’ Eemoghon Mesia, ye siñ to David. Mbeb tonene, ñgara vena?” §

Eval tiina tau tilonloon Yesu saveeñ tooni, tintinisi ve lolozi poia kat.

Yesu iveveen tamtamon pa ñgar pakuruun to yes ñgara to tutuun

(Mt 23:1-36; Lu 20:45-47)

38 Yesu ipaghazonai tamtamon pa Maaron aliinja, ve isaav pazi ighe: “Matamim imomoos pa yes zeran ñgara to tutuun! Yes tigde tinonogh zi pa nonoghiinja toozi mamalaua, ve tilaghaagh

* 12:36: Mbo 110:1; Mban 2:34+; 1Kor 15:25; Hib 1:13 § 12:37: Paesiin to saveeñ ziiri tane ighen ila Mt 22:45.

taghon maaran aate. Leso tamtamon tighit zi, ve tisavia saveeņ popoia pazi imin pakuruuņ zi.

³⁹ Ve isaav ighe tiloņ tila rumei, ma tila pa ghanghaniņ, ene tighe le tileep ila paņ popoiazi tau tighur zi pa yes tau ezazi tintiina na.

⁴⁰ Yes titotombaan zinaara ve tigham ruum toozi tomania saveeņ mariņ toozi imin lezi. Ve tiy-otyoot sunuņ toozi le malaua kat. Leso tamtamon tighit zi tighe yes zeran patabuyaana. Tauvene atuya tau murei pale iza toozi, ene tiina le tiina kat.”

Paitoon to naar ee

(Lu 21:1-4)

⁴¹ Yesu mboole izi Rumei Tiina naagho igharau nugh tau tamtamon tighurghur paitoon toozi ila na,*

ve maata ilala pa eval tiina tau tila pa ghuruuņ paitoon toozi. Kuaz tauņa katini tila, ve tighur maet tintiina ila.

⁴² Ra naar mbolaana ee paam, aana ila ve ighur maet siņsiņai geegeu ru ila.

⁴³ Yesu ighita gabua tana, ve ipoi mbiwa tooni tilam, ve isaav pazi ighe: “Yau nasaav payam kat. Naar tawe, i livaa mbolaana. Eemon maet tau i ighuru we, ene iliiv maet tau tamtamon tisov tighuru na.

⁴⁴ Pasaa, yes tisov lezi maet tiina ighengheen, ve tighur ņgiira mon. Ve naar tawe, mbolaan ighamu.

* **12:41:** Yes Yuda tigharaat gabua imin makau zoonņa mamalaua saņavul ve tol (13), ve tipayooz zi ila Rumei Tiina naagho, leso tamtamon tighur paitoon toozi iloņ ila.

Eemon maet tooni rig to injini pa lepoogh tooni, tauta ighuru isov ila.” *

13

*Yesu isaav pa rewaan Rumei Tiina to Yerusalem
(Mt 24:1-2; Lu 21:5-6)*

¹ Yesu ipul Rumei Tiina, ve ivot ila muuri, ra mbiwa tooni ee isaav pani ighe: “Padudunaañ, ughita. Tirau katin rumei poia ee we pa maet popoia maata maata! Ve rum siriv tau tiyooz tigharau we paam, paghunazi kat.”

² Eemon Yesu isaav pani ighe: “Aazne, ughita rum tintiina tau tiyozyooz we? Yau nasaav payo: Murei pale tireu mbirisai zi tisov tizi. Irau tipul maet eta igheen izala maet ite paavo mako.” *

*Patañani naol pale tivot muun, mako tireu Rumei
Tiina izi
(Mt 10:17-22, 24:3-14; Lu 21:7-19)*

³ Yes tilaagh tizala loloz Oliv, ra Yesu mboole izi ta sewe, ve maata ila pa Rumei Tiina tau iyozyooz we. Petrus, Yakobus, Yoan, ve Andreas tila tooni, ve yes mon tileep tomania, ra tisaav pani tigde:

⁴ “Usaav ghazona payei. Saveeñ tau usavia pa rewaan Rumei Tiina na, ñeez o gabua tana ivot? Ve isaav ighe saawe to gabua naol isov tana igharau ighe ivot, pale saa gabua imin ilaal pani?”

⁵ Yesu isaav pazi ighe: “Matamim imomoos poi pa taumim. Mako pale tamtamon eta igherev gham, ve apul eez tsiau. *

* **12:44:** 2Kor 8:1, 12 * **13:2:** Lu 19:44 * **13:5:** Ep 4:14; 2Tes 2:1+; 1Yo 4:1

⁶ Pasaa, murei, tamtamon naol pale tilam ve tiwaat sorokin ezag, ve tigde: ‘Ñeer tau yam asasañani, ene yau taug tane.’ Ve tamtamon katini pale tighur ila karom toozi tawe, ve tipul eez tsiau.
*

⁷ “Isaav ighe yam alooñ malmal tintiina varuzi, ma alooñ saveeñ yaghur tigde malmal tintiina pale tivot, na asañeeñ sov. Pa gabua tauvene aat ivot itaghton Maaron ñgar tooni. Eemon taan saawe, ene soone.

⁸ Tauvene nugh tintiina pale tigham malmal tomania nugh tintiina siriv. Ve kinik siriv pale tigham malmal tomania kinik to nugh siriv. Ve yogyoog pale itok taan siriv, ve pitool ivot izi nugh siriv. Patañani naol tana, ene imin yavyavuunñ tau zilivaa tiyamaana imin maata. Le isov, o tipoop. *

Tamtamon pale tighur patañani pa yes tau titaghton Yesu

⁹ “Matamim imomoos poi pa taumim. Pa yes Yuda pale tipayooz gham pa savsaveeñ ila daaba toozi naghozi, ve tilos gham ilonñ ila rumei toozi. *
Ve nugh nugh tau tighur koi payau na, pale tipayooz gham pa savsaveeñ paam ila yes pooza to taan ve kinik naghozi pasaa, yam ataghton ghau. Gabua tau ivot payam pa saawe tana, ene pale imin eez payam to avotia varug ve apariaañ saveeñ tsiau ila yes pooza tawe naghozi. *

* **13:6:** Mbañ 5:36+; 1Yo 2:18 * **13:8:** Yes Yuda tighur ila tauvene: Patañani naol aat tivot itaghton Maaron ñgar tooni. Le isov, o Mesia ilam ve igham lepoogh poia ivot. * **13:9:** Mbañ 4:1, 5:17, 22:30+ * **13:9:** Mbañ 16:19, 25:23+

10 Ve vaaru poia, aat tivotia irau nughmarin itaghon Maaron ngar tooni. Le isov o taan saawe ivot.

11 “Isaav ighe tikis gham ve tighur gham ila yes daaba nimazi pa savsaveen, na lolomim bubu ve ail ngar, ma saveen to asavia pazi sov. Saawe tau tipayooz gham pa savsaveen, saa ngar tau ighe ivot payam na, asavia mon. Pa Maaron tauu pale ipaghazonjai gham pa saa saveen tau i ighe yam asavia. Tauvene yam pale asaav itaghon taumim ngar tsiam mako. Ene pale Avuvu Patabuyaanj ivotia aliinja ila yam avomim. *

12 “Saawe tana ighe ivot, tamtamon pale tighur tonvetaz toozi ila yes daaba nimazi, leso tirav zi timaat. Ve zolman pale tigham ngar raraate mon pa natuznja. Ve geegeu pale tighur koi pa tamaznja ve tinaznja paam, ve tighur zi tila yes daaba nimazi, leso tirav zi timaat.

13 Tamtamon tisov pale tighur koi payam. Pasaa, yam avotia yau ezag, ve ataghon ghau. Eemon tamtamon tau ighe iyooz ariaanj ve ikis ghuruunj ila tooni tunja le irau saawe tooni isov, ene aat Maaron igham mulini ve ileep poi.” *

Patajani tiina kat pale ivot pa Yerusalem

(Mt 24:15-28; Lu 21:20-24)

14 Yesu isaav muul ighe: “Murei, yam pale aghita tamtamon tipayooz gabua saghati kat ilonj ila nugh patabuyaanj to tivaghamunia. Nugh tawe, gabua tauvene irau ilonj ila mako. Eemon pale tipayooze iza a iyooz ta sewe, mako tipul nugh

* **13:11:** Mt 10:19-20; Lu 12:11+ * **13:13:** Yo 15:18, 20; Syg 2:7, 11, 3:5

tawe ileple. (Yo sei tau uwaat saveen tane, na ugham n̄gar pani poi.) Isaav ighe gabua tana ivot, tamtamon tau tileep izi taan sirivu to Yudea na, yes aat rekia mon tighawaar tizala pa loloz. *

¹⁵ Tauvene isaav ighe n̄eer eta ilepleep ila nugh to lepoogh ta ruum paavo we, † ene irau izila muul ruum loolo to igham gabua tooni eta ne mako. Izi le ighau malmali ila. *

¹⁶ Ve isaav ighe tamtamon eta ighamgham uraat ila uum, ve patañani tana ivot, ene i paam. Irau imuul ila igham nonoghiin̄a tooni to n̄goaan̄ mako. Ighau mon gha ila.

¹⁷ Saawe tana ighe ivot, zilivaa tau apozi, ve yes payamyam̄n̄a, ene tikaria tauzi wa. Pasaa, ipatañan pazi pa ghaon̄.

¹⁸ Tauvene yam asun̄ Maaron. Leso ighur saawe to patañani tana ila saawe to nugh yaun̄a sov, ve ighur sooso payam to aghau.

¹⁹ Pa patañani to saawe tana, pale tiina le tiina kat. Saawe tau Maaron ighur sambam ve taan gha ilam aazne, patañani tauvene ivot pai eta soone. Ve murei paam, irau ivot muul mako. *

²⁰ Isaav ighe Maaron in̄goor saawe to patañani tana tuuku mako, ene aat tamtamon eta irau ileep mako. Tisov tilalez. Eemon i igham n̄gar pa yes tau i tauu isiigh zi timin le na. Tauta in̄goor saawe tana imin tuuku wa.

²¹ “Saawe tana, ighe tamtamon eta isaav payam ighe: ‘Aghita. Mesia tauta ene!’ ma isaav ighe: ‘I

* **13:14:** Dan 9:27, 11:31, 12:11 † **13:15:** Yes Yuda, ruum toozi pavozi babaan̄a. Tauvene tirourou ta sewe imin iit tarourou ila patar. * **13:15:** Lu 17:31 * **13:19:** Dan 12:1; Yoel 2:2

ileep izi sewe!’ na aghur ila saveeñ tooni sov. *

²² Pasaa, zeran karomña pale tiburig, ve siriv titoom tigde yes Mesia. Ve siriv pale titoom tigde yes propet tau tivotia Maaron aliinja. Ve yes pale tigham gabua ngeretazi tomania ilaal siriv tivot paam. Leso tigherev tamtamon gha tipul eez to Maaron. Yes tau Maaron isiigh zi timin i le na paam, isaav ighe zeran karomña tawe tiroa, ene pale titoova to tigherev zi, lesa tipul eez to Maaron. *

²³ “Aloonj. Gabua naol tane tivot soone, ve yau nasavi zi payam pataghaan. Tauvene matamim imomoos poi pa taumim.

Muleeñ to Tamtamon Naatu

(Mt 24:29-31; Lu 21:25-28)

²⁴ “Isaav ighe patañani to saawe tana tivotiir le isov, ene pale aaz ighaaz muul mako, ve nugh ndoroom. Ve kaiyo paam, pale isul muul mako.

²⁵ Pitum to sambam saamba pale tipul niazi, ve titaptap tizi. Ve Maaron pale ivatoki gabua siriv to sambam saamba tau tapirizi tiina na le tirur.

²⁶ Mako tamtamon matazi izala le tighita Tamtamon Naatu ileep ila taitai loolo, ve izilam toman tapiri ve mbonari tiina kat. *

²⁷ Ve i aat imbaan anela tooni tila tirau taan ziige paan. Leso tiyauur yes tau i isiigh zi timin le na, ve tigham zi tila tooni. Pale tila pa ragh puughu, dau-dau puughu, yavaar puughu, ve kaagu puughu.”

Saveeñ palelaan to ai fik

(Mt 24:32-35; Lu 21:29-33)

* **13:21:** 2Tes 2:1+ * **13:22:** Lo 13:1+; 2Tes 2:9+; Syg 13:13

* **13:26:** Dan 7:13; 1Tes 4:16+; Syg 1:7

²⁸ Ra Yesu isaav pazi muul ighe: “Agham ɲgar pa ai fik. Ighe booga mbitai ve mbiila paghpaaghu tivot, na aghilaal aghe saawe to aaz ighe ilam tane.

²⁹ Gabua tau nasavi zi ne, ene ɲgara raraate mon. Isaav ighe aghita gabua naol tane tivotvot, mako awatagh aghe: Saawe to Tamtamon Naatu muleeɲ tooni, ene ilam igharau wa, imin tamtamon tau iyooz ila ataman aavo.

³⁰ Onoon kat, yau nasaav payam: Yes to saawe tane pale timaat soone, ve tighita gabua tana tisov tivotiir.

³¹ Sambam saamba ve taan pale tilalez. Eemon saveeɲ tsiau ziiri eta irau ilale ne mako.” *

Saawe duduun to Tamtamon Naatu muleeɲ tooni, ene tamtamon eta iwataghi mako

(Mt 24:36-44; Lu 12:40)

³² Yesu isaav muul ighe: “Saawe duduun to Tamtamon Naatu muleeɲ tooni, ene tamtamon eta iwataghi mako. Aɲela tau tileep sambam we tiwataghi mako, ve Naatu paam, iwataghi mako. Taama Maaron mon, ta iwataghi. *

Tamamaat ariaaɲ ve tagham poghania uraat tau Maaron ighuru ila nimaan

³³ “Tauvene matamim imomoos poi pa taumim ve amamaat ariaaɲ. Pa saawe tana, yam awataghi mako.

³⁴ Pale ivot imin ɲeer ee tau ighe iburig gha ila pa nugh malau. Tauvene ighur uraat irau besooɲa tooni, ve ipul ruum tomania gabua tooni siriv ila nimazi, lesu tiɲgini. Ve isaav pa besooɲa tooni tau

* **13:31:** Mbo 102:25, 119:89; Mt 5:18 * **13:32:** Mbaɲ 1:7; 1Tes 5:1+

ingin ataman na ighe ighur maata pani ve isanani. Ighur uraat pazi le isov, ra ipul zi, ve ila. *

³⁵ “Tauvene yau nasaav payam. Amamaat ari-aan. Pa saawe duduun to ruum tauņa muleen tooni, ene yam awataghi mako. Pale ilam pa ravrave geeg, mbonj anooņa, nugh itun, ma mbonjoozo, ene yam awataghi mako.

³⁶ Tauvene yam amamaat ari-aan. Mako pale aghengheen, ve i ilat gha ipaperekin gham.

³⁷ Tauvene saveen tau yau nasavia payam, ene ila pa tamtamon tisov paam: Amamaat ari-aan.”

14

*Yes daaba to Yuda tiil eez to tirav Yesu imaat
(Mt 26:1-5; Lu 22:1-2; Yo 11:45-53)*

¹ Mbonj ru isov, mako tizaa pa saawe to Pasova * tomania lupuun tiina to yes Yuda tau tilup zi pa sunjuun ve tighan mberet tau le yis mako na. Yes daaba to watoonrau tomania yes ngara to tutuun tighe tirav Yesu imaat. Tauvene tilup zi, ve tiil eez to tikisi imin yongaan.

² Tisaav tighe: “Iit irau takisi pa saawe to lupuun tiina tane mako. Pa ighe tagham tauvene, ene pale tareu eval tiina lolozi, ve tipaburigin malmal.” *

*Livaa ee ilij ngoreen tau vaazi poia na izala Yesu daaba
(Mt 26:6-13; Yo 12:1-8)*

* **13:34:** Mt 25:14; Lu 12:35+ * **14:1:** Pasova, ene lupuun tiina to yes Yuda tau matazi ingal imuul ila pa saawe tau timbuzņa tileep saghat izi Isip, ve Maaron igham mulin zi ila yes Isipa nimazi.

* **14:2:** Mbo 2:1-3

³ Neer ee to nugh Betania, eeza Simon. I, muun kolekole ighamu. Yesu tomania mbiwa tooni tila ruum tooni ve mbolezi izi pa ghanghaniin, ve livaa ee igham ngoreen paatu paghuuna ee tau ngoreen igheen ila na, ve ilam. Ngoreen tawe, vaazi poia, ve atuya tiina kat. Tigharaata pa gabua tau tiwaat eeza tigde ‘nard.’ I igham ngoreen paatu tawe, ve isen polin aavo, † ra ilinji izala Yesu daaba.

⁴ Tamtamon toozi siriv tighita ngar tau i ighamu na, le irau lolozu mako. Tauvene tiyau avozi pa livaa tana tigde: “Wai, i ivaghamunia ngoreen tawe pasaa?”

⁵ Gabua tawe, atuya tiina kat. Imin ta tagholia, kanan tagham maet tiina kat irau 300 denari ma vene, lesu tauul yes mbolaanja pani!” Tauvene tiyaon livaa tana.

⁶ Eemon Yesu isaav pazi ighe: “Ayau avomim pani pasaa? Apuli ileep. Ngar tau i igham payau, ene paghuuna.

⁷ Yes mbolaanja pale yamja alepleep irau saawe. Tauvene saawe sindei tau yam aghe auul zi, ene irau auul zi. Eemon yau, malau mako pale napul gham. Irau naleep tomani gham muul mako.

⁸ Ngar tau livaa tane irau igham payau, tauta ighamu wa. Ngoreen tau i ilinji izala pavog, ene imin i igharaat ghau pataghaan pa mateegh tsiau.
*

⁹ Tauvene yau nasaav payam kat: Murei, tamtamon pale tila tivotia vaaru poia irau taan isov.

† 14:3: Ngoreen paatu to livaa tane, ene aavo malaua. Tauta i isen polin aavo. * 14:8: Yo 19:40

Ve nugh sindei tau tivotia vaaru poia pazi, ene pale tisavia n̄gar tau livaa tane igham payau. Leso tamtamon matazi kisini.”

Yudas isaav ighē i pale ighur Yesu ila koiṅa nimazi

(Mt 26:14-16; Lu 22:3-6)

¹⁰ Mbiwa to Yesu saṅavul ve ru, toozi ee, eeza Yudas Iskariot. Saawe tana, i ila to yes daaba to watoonṅrau, ve isaav pazi ighē i pale ighur Yesu ila nimazi.

¹¹ Yes tilooṅ saveeṅ tooni le lolozi poia kat, ve yesṅa timbu saveeṅ tighē pale tigham le maet siriv. Timbu saveeṅ le isov, ra Yudas ila ve isasaṅan. Ighē saawe poia eta ivot, o ighur Yesu ila nimazi.

Mbiwa to Yesu tila tigharaat aniṅ to Pasova

(Mt 26:17-19; Lu 22:7-13)

¹² Tilepleep le saawe imin maata to lupuuṅ tiina to ghaniṅ mberet tau le yis mako na ivot. Saawe tana, yes Yuda tiravrav sipsip natṅa pa ghanghaniṅ to Pasova. Tauvene mbiwa tooni tighason Yesu tighē: “Yo ughe nila nigharaat aniṅ to Pasova payo izi sindei?” *

¹³ Tauvene Yesu imbaaṅ mbiwa tooni ru tila, ve isaav pazi ighē: “Yamru aloṅ ala nugh tiina Yerusalem, mako aghita ṅeer ee ibaad uur to yaa, ve ilaagh ṅarui gham ilat.

¹⁴ Matamim kisini ve ataghoni. Ruum sindei tau ighē i ilooṅ ila, yamru ataghoni aloṅ ala. Ve asaav pa ruum taunṅa aghe: ‘Paduduṅaaṅ toit ighason ghom ighē: Ruum loolo tau yo ughuru pani na,

* **14:12:** Igham 12:6+

igheen sindei? Pa i ighe yesja mbiwa tooni tilup zi ta sene pa ghanghaniij to Pasova.’

¹⁵ Neer tana pale itotoi ruum loolo tiina ee payam. Igheen izala saaja. Nugh to lepoogh ve ghanghaniij, ene gharatoonj wa. Yamru agharaat leen aniij izi ta sewe.”

¹⁶ Yesu isavsavv pazi le isov, ra mbiwa tooni tawe tiburig gha tilonj tila Yerusalem, ve tighita gabua isov ivot itaghon Yesu aliija. Tauvene tigharaat aniij to Pasova izi ta sewe.

Yesu tomania mbiwa tooni tighan aniij to Pasova

(Mt 26:20-25; Lu 22:14-23; Yo 13:21-30)

¹⁷ Ravrav izi, ve Yesu tomania mbiwa tooni sajavul ve ru tila tivot ruum tawe, ve mbolezi izi pa ghanghaniij to Pasova.

¹⁸ Yes tighanghan, ve Yesu isaav pazi ighe: “Yau nasaav payam kat. Yam tane, tsiam ee tau aazne ighanghan tomani ghau ne, pale ighur ghau nala koiagna nimazi.” *

¹⁹ Mbiwa tooni tiloonj saveenj tane, le lolozu ipatajan. Tauvene yes enaenja tisaav pani tigde: “Wai, pale naghama ngar tauvene payo wa? Yau irau naghama tauvene mako.”

²⁰ Yesu isaav pazi muul ighe: “Yam sajavul ve ru tane, tsiam ee tau yeiru nizeev mberet izila rubruub eemon, ene i ta pale ighama ngar tane.

²¹ Tauvene Tamtamon Naatu aat ila gha tiravu imaat itaghon saveenja tau tiboode pataghaan wa. Ve neer tau pale ighuru ila koinja nimazi na, ikaria tauu wa! Imin ta tiina ipoopa mako, kananj poia!”

* **14:18:** Mbo 41:9

*Yesu irei mberet ve vaen pa mbiwa tooni
(Mt 26:26-30; Lu 22:17-20; 1Kor 11:23-25)*

²² Yes tighanghan, ve Yesu igham mberet ve ipait Maaron pani. Ra iteeva, ve ireii irau mbiwa tooni, ve isaav pazi ighe: “Aghamu. Ene yau mizag.”

²³ Ra igham rubruub vaen, ipait Maaron pani, ve izuzuuna ila pazi, ve yes tisov tighun ila. Ve isaav pazi ighe:

²⁴ “Ene yau sinig tau pale imalinj pa tamtamon katini. Leso ipariaan saveen mbuaan to eez paaghu tau pale Maaron ve tamtamon tivalupu zi timin eemon. *

²⁵ Yau nasaav payam kat: Yau aat naghun vaen muul mako, le irau saawe paaghu ivot ve itinja talup ghiit muul izi sambam, o naghun.”

²⁶ Tighanghan le isov, ve timbou mbouj ee to tipakur Maaron, ra tivot tila muuri, ve tizala pa loloz Oliv. *

*Yesu isaav ighe Petrus pale ipaisamuna
(Mt 26:31-35; Lu 22:31-34; Yo 13:36-38)*

²⁷ Yesu tomania mbiwa tooni tila tivot loloz Oliv, ra isaav pazi ighe: “Mboj aazne, yam asov pale atap pa ghuruuj ila tsiam, ve aghur murimim payau. Pasaa, Maaron aliinja tau tiboode na, isaav tauvene:

‘Yau aat narav nginiin to sipsip
ve sipsip tiparghaghau.’ *

* **14:24:** Igham 24:8; 1Kor 10:16; Hib 8:8, 9:16+
118:29 * **14:27:** Sek 13:7; Yo 16:32

* **14:26:** Mbo

28 “Eemon murei, saawe tau Tamañ Maaron ipaburigin ghau pa mateegh, yau aat namuun nala nasañan gham izi Galilaia.”

29 Petrus iloon saveen tane, ve isaav ariaan pa Yesu ighe: “Ene aat yes siriv. Ve yau irau natap ve naghur murig payo ne mako.”

30 Yesu isaav pani ighe: “Aa Petrus, yau nasaav payo kat. Mbon aazne, yo aat upaisamun ezag pai tol le isov, o tatareek itañ muul imin pai ru.”

31 Tauvene Petrus isaav ariaan muul ighe: “Sei isaav! Isaav ighe tirav ghau namaat tomani ghom, ene poia. Tirav ghau lak! Eemon irau napaisamun yo ezam mako.” Ve mbiwa tooni tisov tisavia saveen raraate mon.

Yesu isun izi Getsemane

(Mt 26:36-46; Lu 22:39-46)

32 Ra Yesu igham mbiwa tooni gha yesña tilaagh tila tivot nugh ee, eeza Getsemane. Tila tivot ta sewe, ve i isaav pazi ighe: “Mbolemim izi ta sene, ve yau nala nasun izi sewe.”

33 Ra igham Petrus, Yakobus, ve Yoan gha yesña tila soghan rig. Saawe tana, Yesu loolo ipatañan le ipatañan kat, ve igham ngar naol pa patañani tau pale ivot pani.

34 Tauvene isaav pazi ighe: “Oyai, lolog ipatañan kat le rigmon kanan namaat. Yam aleep izi ta sene ve amamaat ariaan.” *

35 Ra ilaagh ila rig, itap izi taan, ve ighason Maaron ighe irau to ipasalia patañani tana pani, ma mako? Pasaa, Yesu iwatagh: Saawe to patañani iza tooni, tauta ivot wa.

* 14:34: Yo 12:27

36 Ve isaav ighe: “Abba, †
Tamañ, gabua eta ikeek ghom mako. Yau naghe
upasalia rubruub §
tane payau. Eemon utaghon ngar tsiau sov.
Utaghon taum lolom.”

37 Isuñ le isov, ra imuul ila to mbiwa tooni tol
tana, ve ighit zi tighengheen. Tauvene isaav pa
Petrus ighe: “Simon, yo ugheen? Mindai, irau
umamaat rigta mako?”

38 Yam amamaat ariaañ ve asuñ. Mako pale
tovañ ivot payam, ve rekia mon atap ve apul ghu-
ruuñ ila tsiam. Onoon, loloon taghe le tataghon
Maaron ngar tooni. Eemon ngar to uliin iyaryañ
ila loloon, tauta igham ghiit tapiriin imbool.” *

39 Yesu isavsaav pazi le isov, ra ipul zi, ve ila isuñ
muul itaghon suñuuñ tau papazoge ighamu na.

40 Isuñ le isov, ra imuul ila to mbiwa tooni, ve
ighit zi tighengheen soone. Pasaa, matazi irav zi
kat pa ghenooñ. Tauvene matazi ingal saveeñ eta
to tisavia pani ne mako.

41 Yesu ila isuñ muul imin pai tol, ra imuul
ila, ve isaav pazi ighe: “Wai, yam aghengheen
soone? Irao lak! Ene saawe to auul tinimim mako.
Pa saawe to tighur Tamtamon Naatu ila zeran
sasaghati nimazi, tauta ivot wa.

42 Aburig gha tala. Aghita. Neer tau ighe ighur
ghau nala koiagna nimazi, tauta ilam peria wa!”

† **14:36:** ‘Abba’, ene yes Israela aliñazi ziiri ee. Yes Israela natuzña
geegeu tipoipoi tamazña tigde: ‘Abba’, imin iit natuunña tipoipoi
tamazña tigde ‘Ama’. § **14:36:** Rubruub tau Yesu isavia, ene izaa
to patañani tau i pale ibaado, leso ireu sosor to tamtamon ve itatan
Maaron aatyavyav tooni. * **14:38:** Ro 7:23; Ga 5:17

*Tikis Yesu**(Mt 26:47-56; Lu 22:47-53; Yo 18:3-12)*

⁴³ Yesu isavsaav soone, ve Yudas igherev eval tiina gha tilam peria. (Mbiwa sanjavul ve ru, i toozi ee.) Eval tiina tawe, yes daaba to watoonrau tomania yes ngara to tutuun ve pooza siriv to yes Yuda timbaan zi. Yes tikis mbuzaagh ma zaab le irau zi.

⁴⁴ Yudas igharaat saveen pazi pataghaan ighe: “Tala peria ve ighe aghita nasaghav neer eta ve nayanin pani, ene i tauu. Akisi, zaaba tinjin poghania, ve aghamu ala. Yau aat naghur ilaal tauvene payam, lesa aghilaal neer tawe.”

⁴⁵ Tauvene saawe tau tila tivot toozi, Yudas rekia mon injarui Yesu ila, ve isaav pani ighe: “Aa Padudunjaan!” ve isaghavu ve iyanin pani.

⁴⁶ Ra eval tiina tana tikis Yesu.

⁴⁷ Tauvene yes tau tiyooz tomania Yesu na, toozi ee ipas mbuzaagh tooni iza, ve isiki le isap motin neer ee taliija. Neer tawe, i daaba to watoonrau besoonja tooni.

⁴⁸ Ra Yesu isaav pa eval tiina tana ighe: “Mindai ta alaagh toman mbuzaagh ma zaab, ve alam pa kisiin ghau? Yau neer to ghamuun malmal?”

⁴⁹ Saawe naol, itija talepleep izi Rumei Tiina naagho, ve napaghazonjai gham pa Maaron aliija. Puughu mindai ta akis ghau pataghaan ta sewe mako? Poia. Akis ghau lak. Lesa Maaron aliija tau tiboode pataghaan na ighur anoonja.”

⁵⁰ Yesu isavia saveen tane, ve mbiwa tooni tisov tipuli, ve tighawaar. *

* **14:50:** Mbo 88:8; Mk 14:27

⁵¹ Neer paaghu ee itaghon Yesu gha yesṇa tila tivot nugh tawe. I ikawaal uuli mon. Yes zaaba tighē tikisi paam.

⁵² Eemon tigham sapirini, ve tikis uuli tooni mon. Tauvene kambaṅmbaṅi, ve ilaan ighau gha ila. *

*Tipayooz Yesu ila daaba to yes Yuda naghozi
(Mt 26:57-68; Lu 22:54-55, 63-71; Yo 18:13-14, 19-24)*

⁵³ Yes tigham Yesu tila, ve tighuru ilonṅ ila ruum to daaba tau imuunṅ pa yes to watoonṅrau. Daaba tisov to watoonṅrau, tomania yes ṅgara to tutuunṅ ve yes pooza tilup zi ta sewe ve tisaṇaṅ.

⁵⁴ Petrus ipaspas ghi poipoi, ve itaghon Yesu gha ila. Eemon ilaagh malau rig, pasaa iroi. Tauvene vene le ila peria sirsiir to ruum tawe. Ra ilonṅ ila sirsiir loolo, ve mboole izi tomania uraata siriv to daaba to watoonṅrau ila yav ziige, ve yav ilavlaavo.

⁵⁵ Yes daaba to watoonṅrau tomania tamtamon tisov to lupuunṅ tiina tau tinṅinṅinṅ yes Yuda na, titoova to tiil tamtamon siriv to tipariaaṅ saveeṅ tighē yes tighita Yesu igham sosor. Leso imin puughu pani to tiravu imaat. Eemon ṅgar toozi ighur mako.

⁵⁶ Onoon, tamtamon katini tipariaaṅ saveeṅ karom tighē yes tighita Yesu igham sosor. Eemon saveeṅ toozi raraate mako. Tisavia saveeṅ maata ite ite. *

⁵⁷ Ra zeran siriv tiburig, ve tinṅal saveeṅ pani tighē:

* **14:52:** Zerān ṅgara siriv tighē neer paaghu tau ighau ila, ene Markus tau ibood vaaru poia tane. * **14:56:** Igham 20:16; Lo 19:15

58 “Yei niloonj ñeer tane isaav ighe: ‘Rumei Tina tau tamtamon tirao pa nimazi na, yau aat nareua izi, ve napayooz rumei ite pa mbonj tol mon. Rumei tana, tamtamon pale tirao pa nimazi mako.’ ” *

59 Eemon yes paam, aliñazi raraate mako. Saveenj toozi maata ite ite.

60 Tauvene daaba to watoonjrau iburig iyooz ila yes pooza tawe naghozi, ve isaav pa Yesu ighe: “Uloonj wa? Yes tipariaañ saveenj tigde tiloonj ghom usavia saveenj tauvene. Mindai, irau uyol saveenj toozi, ma mako?”

61 Eemon Yesu iyol saveenj eta mako. Ineneenj mon. Tauvene daaba to watoonjrau ighasoni muul ighe: “Usaav ghazonja payei lak. Yo Mesia? Maaron tau tamtamon tipapaiti pa poia tooni na, Naatu yo?” *

62 Yesu iyol aliinja ighe: “Vee! Taug tane. Ve murei, yam pale aghita:

‘Tamtamon Naatu ileep ila niia to ghamuunj pooz tau igheen ila Maaron saksaki niima tapir. Ve i pale ileep ila taitai to sambam, ve imuul izilam.’ ” *

63 Daaba to watoonjrau iloonj saveenj tana le ireu loolo. Tauvene iranğat nonoghiinja tooni, ve isaav ighe: “Isov wa! Tail tamtamon ite paam to ipariaañ saveenj muul pasaa?

64 Aazne, yam taumim aloonj katin saveenj ila i tauu aavo wa. I isavia saveenj veleghiinj pa Maaron. Laak, yam agham ñgar pani mindai?”

* **14:58:** Yo 2:19; Mbanj 6:14 * **14:61:** Is 53:7 * **14:62:** Mbo 110:1; Dan 7:13; Syg 1:7

Yes tisov tilup avozi, ve tisaav tighe: “I isosor wa. Tamtamon tauvene irau ileep mako. I aat imaat.”
*

⁶⁵ Ra tamtamon toozi siriv tiburig gha tinazuvu, tikau maata, tiravu, ve tipañizaini tighe: “Yo propet, ne? Na uvotia Maaron aliinja payei!” Ra yes uraata siriv to Rumei Tiina anazi tighamu, ve tiposai naagho paam.

Petrus ipaisamun Yesu eeza

(Mt 26:69-75; Lu 22:56-62; Yo 18:15-18, 25-27)

⁶⁶⁻⁶⁷ Saawe tau yes daaba tiloon saveņ to Yesu, Petrus ilepleep igharau yav tau tindavu ila sirsiir loolo na, ve yav ilavlaavo. Livaa paaghu ee tau ibesbees pa daaba to watoonrau na ilam ve itugh maata pa Petrus, ve isaav ighe: “Ai, yo tane, ulaghlaagh tomania Yesu to Nasaret paam.”

⁶⁸ Eemon Petrus ipaisamun tauu ighe: “Wai, saveņ tau yo usavia ne, yau nawataghi mako. Nakankaan pani.” Ra ipul niia tawe, ve izuur ivot igharau sirsiir aavo. Saawe tana, tatareek itañ.

⁶⁹ Besoonja livaa tawe maata ila le ighita Petrus muul. Tauvene isaav pa yes tau tiyozyooz tigharauu na ighe: “Ai, aghita! Neer tane, i toozi ee paam.”

⁷⁰ Eemon Petrus ipaisamun tauu muul.

Tilepleep rig, ra yes tau tiyooz tigharau Petrus na, anazi tisaav pani tighe: “Onoon kat. Yo tane, toozi ee paam. Pasaa, yo to Galilaia.”

⁷¹ Tauvene Petrus iburig, ve aavo iyaryaan kat ighe: “Onoon sambam, neer tau yam asasavia

* **14:64:** Wkp 24:16; Yo 19:7

na, yau nawataghi rigta mako kat. Ighe natoon, Maaron tauu pale ivaghamun ghau!”

⁷² Saawe duduun tana, tatareek itañ muul imin pai ru. Tauvene Petrus maata ingal Yesu aliinja tau ighe: “Mbon aazne, yo aat upaisamun ezag pai tol, o tatareek itañ muul imin pai ru.” Tauvene Petrus loolo isaghat kat, ve itañ tiina.

15

*Tipayooz Yesu pa savsaveeñ ila Piladus naagho
(Mt 27:1-2, 11-14; Lu 23:1-5; Yo 18:28-38)*

¹ Mbonoozo geeg, yes daaba to watoonrau tomania ngara to tutuun, ve daaba siriv to lupuun tiina tau tinginngin yes Yuda na, tisov tilup zi, ve tivasavo zi pa saa ngar ta pale tigham pa Yesu. Le isov, ra tikis Yesu, tikau niima, ve tighamu tila tighuru ila Piladus niima.

² Piladus ighason Yesu ighe: “Mindai, yo tane kinik to yes Yuda?”

Yesu iyol aliinja ighe: “Saveeñ tauta taum usavia na.” *

³ Ra yes daaba to watoonrau tiburig, ve tingal saveeñ naol pa Yesu.

⁴ Tauvene Piladus ighasoni muul ighe: “Mindai, yo irau uyol saveeñ toozi, ma mako? Ughita. Yes tingal saveeñ naol payo.”

⁵ Eemon Yesu isavia saveeñ eta muul mako. Ineneen mon. Tauvene Piladus igham ngar naol.
*

*Piladus iyok ighe tirav Yesu izala ai pambaroon
(Mt 27:15-26; Lu 23:13-25; Yo 18:39-19:16)*

* 15:2: Yo 18:36-37 * 15:5: Is 53:7

⁶ Ndaman ta naol ne, lupuunj tiina to Pasova ighe ivot, ene Piladus ighamgham tauvene: Yes tau tileep ila ruum to yavyavuunj loolo, isaav ighe eval tiina tighasoni to ipul toozi eta ivot, ene i aat ipuli ivot.

⁷ Saawe tana, njeer ee, eeza Barabas, yesnja zeran siriv paam tileep ila ruum to yavyavuunj loolo. Pasaa, saawe tau eval tiina tipaburigin malmal to tiziir gavman to Rom, Barabas tomania zeetnja tawe tirav tamtamon siriv timaat.

⁸ Tauvene eval tiina tila to Piladus, ve tighasoni tigde ipul tamtamon toozi eta ivot itaghon njar tau monmon ighamghamu na.

⁹ Piladus iyol alinjazi ighe: “Mindai? Yam aghe yau napul kinik to yam Yuda ilat payam?”

¹⁰ Piladus isaav tauvene pasaa, i iwatagh: Daaba to yes Yuda tigham Yesu ilam, ve tighuru ila niima pasaa, tighita tamtamon katini tipaiti pa uraat tooni ve titaghoni. Tauta ireu yes daaba tawe lolozi ve tighur koi pani.

¹¹ Eemon yes daaba to watoonjrau tipazaagh eval tiina, lesu tiyok pa Piladus alinja sov, ve tighasoni to ipul Barabas ivot ila. *

¹² Tauvene Piladus ighason zi muul: “Ighe tauvene, pale naghama mindai pa njeer tau yam awaato aghe i kinik to yam Yuda?”

¹³ Yes tiboob muul toman alinjazi tiina tigde: “Uravu izala ai pambaroonj!”

¹⁴ Tauvene Piladus ighason zi muul ighe: “Pasaa? I ighama saa sosor?”

Eemon tinoknok bobaañ tigde: “Uravu izala ai pambaroonj!”

* **15:11:** Mbañ 3:13+

15 Piladus ighe igham eval tiina tawe lolozi poia. Tauvene iloon alinjazi, ve ipul Barabas ivot ila toozi. Ve isaav gha tilos Yesu. *
Ra ighuru ila zaaba tooni siriv nimazi. Leso tighamu tila ve tiravu izala ai pambaroonj.

*Yes zaaba tipamogherai Yesu ve tilosi
(Mt 27:27-31; Yo 19:2-3)*

16 Yes zaaba tawe tigham Yesu gha tilonj tila gavana ruum tooni loolo, ra tipoi zetazja tisov tilam tilup zi, ve tipamogherai Yesu imin i kinik.

17-18 Tigham uuli ee tau ngereeta imin aindan, ve tisiki izala Yesu avaara. Ve tigham waar tu-atua gha titalia, ve tighuru izala Yesu daaba imin moghar ndamoonda. Ra tisaav pani tighe: “Iya, aa kinik to yes Yuda, yei nipakur ghom!”

19 Ve tigham toon gha tiloslos daaba pani, tinazuvu, ve tiput aghezi pani imin pakuruunji.

20 Tipanjizaini le isov, ra tizuum uuli tau ngereeta imin aindan na izi pani, ve tinonoghi pa tauu uuli tooni muul, ve tighamu tila, lesu tiravu izala ai pambaroonj.

*Tirav Yesu izala ai pambaroonj
(Mt 27:32-44; Lu 23:26-43; Yo 19:17-27)*

21-22 Yes tipul nugh tiina Yerusalem, ve tilaagh taghon eez tila, le tizaa to neer ee to nugh Sairini, eeza Simon. I Aleksander ve Rupus tamazi. I ileep Yerusalem ziige, ve ighe ilonj ila pa nugh tiina. Yes zaaba tighita, ve tikisi ve tighur ai pambaroonj to Yesu izala avaara gha aana ibaado, ve tila tivot

* **15:15:** Ravraav tau Roma tiloslos tamtamon pani na, timbit gabua matazi ila, lesu irangat tamtamon ulizi ve mizazi.

nugh ee, eeza ‘Golgata.’ (‘Golgata’ puughu tau-vene: Nugh tau ghitoonja imin tamtamon daaba rubruuba.)

²³ Zaaba tana tighe tigham Yesu le vaen tau titoora tomania marasin, leso iuule pa yavyavuun tooni. Eemon i loolo pa ghunuunni mako.

²⁴ Yes tiravu izala ai pambaroon, ra tigham Yesu nonoghiinja tooni tomania gabua tooni siriv, ve tighe tirei zi irau zi. Tauvene tipayooz mbuur, leso itotoi sei tau pale igham saa gabua. *

²⁵ Saawe tau tirav Yesu izala ai pambaroon, aaz anunu igham liim ve paan.

²⁶ Tibood paesiinj to mateegh tooni puughu izala ai pambaroon tooni daaba. Paesiinj tawe isaav ighe: ‘Kinik to yes Yuda.’

²⁷⁻²⁸ Saawe tau tirav Yesu izala ai pambaroon, tirav tamtamon ru paam. Ee, tipayooze ila pa Yesu niima tapir, ve ite ila pa njas. Yesuru zeran to taliinjizi ve ghamuun malmal. † *

²⁹ Saawe tau Yesu ituktuuk ila ai pambaroon, eval tiina tilala tilamlam. Ve titurun luazi imin veleghiinjni, ve tisiksik saveen veleghiinj pani tighe: “Aa, ughita wa! Yo ta ughe ureu Rumei Tiina izi, ve mbonj imin tol, o upayooze muul.

³⁰ Poia. Uul taum ve uzi pa ai pambaroon tsio!” *

³¹ Yes daaba to watoonrau tomania ngara to tuuunj tivelegghi paam. Tivasavo zi tighe: “I iuluul tamtamon naol, eemon irau iuul tauu mako.

* **15:24:** Mbo 22:18 † **15:27-28:** Yes Roma tirav tamtamon ila ai pambaroon pa sosor sorok mako. Yes tau sasaghatizi kat, ve yes tau tigham malmal to tiziir gavman to Rom na, yes mon ta gavman to Roma tirav zi ila ai pambaroon. * **15:27-28:** Is 53:12 * **15:30:** Mbo 22:7, 109:25; Yo 2:19

³² I ighe i Mesia ve kinik to iit Israela. Poia. Taleep ve taghita. Ighe ipul ai pambaroonj tooni gha izilam taan, o taghur ila tooni!” Zeran ru tau tirav zi izala ai pambaroonj igharau Yesu na, yesuru paam tisiksik saveenj veleghiinj pani.

Yesu imaat

(Mt 27:45-56; Lu 23:44-49; Yo 19:28-30)

³³ Aaz anunu izalam zegmatuugh, ra ndoroom tiina ivot irau taan isov, ve ighengheen tauvene le aaz ivool (3 kilok).

³⁴ Ra Yesu iboob aliinja tiina ighe: “Eloi, Eloi lema sabaktani!” Saveenj tane, puughu tauvene:

‘Maaron tsiau, Maaron tsiau! Puughu mindai ta ughur murim payau?’ *

³⁵ Tamtamon siriv tau tiyozyoos tigharau Yesu na, tiloonj sapirin saveenj tane, ve tisaav tigde: “Aloonj! Ipoi propet Ilia.” ‡

³⁶ Tauvene tamtamon toozi ee ilaan ila igham spans, ve izeeva izila uur ee tau vaen ighen ila. Ra ikauu ila ai malaua ee, ve izuzuuna izala pa Yesu, leso igholooma. Ve isaav ighe: “Aleep ve taghita. Pale Ilia ilam iuule ve ighamu izi, ma mako?” *

³⁷ Ra Yesu iboob muul toman aliinja tiina, ve iyav-aghan gha imaat.

³⁸ Saawe duduunj tana, uuli tiina tau ituuk ila Rumei Tiina loolo ve iponpoon nugh tau

* **15:34:** Mbo 22:1 ‡ **15:35:** Yes Israela tiwaat propet Ilia eeza tigde ‘Eliyahu.’ Tauta saawe tau Yesu ipoi Maaron ighe “Eloi, Eloi”, tamtamon tigde pa i ipoi Ilia. * **15:36:** Mbo 69:21

patabuyaany kat na, imaranyat ta saanya we, ve malmali izila siinya, le imin ru. *

³⁹ Daaba to yes zaaba iyozyooz ila Yesu naagho, ve ighita Yesu imaat. I ighita mateegh tooni, ite kat. Tauvene isaav ighe: “Onoon kat, neer tane, i Maaron Naatu.” *

⁴⁰ Zilivaa siriv tiyozyooz soghan, ve timamarar gabua tau ivotvot na. Zilivaa tawe, toozi tol, ene Maria to nugh Magdala, ve Maria ite tau Yakobus marani ve Yosep tinazi na, ve Salome.

⁴¹ Saawe tau Yesu ighamgham uraat izi Galilaia, zilivaa tana titaghoni ve tibesbees pani. Ve zilivaa naol tau yesnya Yesu tilaagh tila pa Yerusalem na, yes paam tileep tomani zi.

Tighur Yesu paata ila naal loolo

(Mt 27:57-61; Lu 23:50-56; Yo 19:38-42)

⁴² Saawe tana, ene saawe to titartar pa umbom patabuyaany tau ighe ivot. Ve ravrav izi wa.

⁴³ Tauvene neer ee to nugh Arimatea, eeza Yosep, ipariaany ghi ve ila to Piladus gha ighasoni ighe iyokia Yesu paata pani. Yosep, i neer ee tau eval tiina titandagh pani, ve tipapait eeza. I ileep ila lupuuny tiina to yes daaba tau tinjinyin yes Israela. Ve ighurghur maata pa saawe to Maaron itotoi pooz tooni ivot ighazoonj.

⁴⁴ Saawe tau Yosep ipaes pa Piladus ighe Yesu imaat wa, Piladus igham ngar naol ighe: “Yesu imaat onoon, ma mako?” Tauvene ipoi daaba to yes zaaba tau tirav Yesu izala ai pambaroonj na ilam, ve ighasoni ighe: “Yesu imaat kusia wa, ma soone?”

* **15:38:** Igham 40:21; Hib 6:19, 10:19+ * **15:39:** Mk 1:24

⁴⁵ Daaba tawe ipaes pani ighe Yesu imaat wa. Tauvene Piladus iyokia Yesu paata pa Yosep.

⁴⁶ Yosep ighol uuli pisosoonja ee, ve ighamu ila. Ve yesnja zeran siriv tizugh Yesu paata izi pa ai pambaroon, ve tizunua pa uuli tawe. Ra tighamu tila, ve tighuru ilonj ila maet puura ee tau tigharaata pataghaan imin naal pa mateegha. Ve tipatambulia maet tiina ee ila ipoon puura aavo.

⁴⁷ Maria to Magdala yesuru Maria ite tau Yose tiina na tileep tomani zi paam. Tauvene yesuru tila tighita nugh tau tighur Yesu paata pani na.

16

Yesu iburig pa mateegh

(Mt 28:1-8; Lu 24:1-12; Yo 20:1-10)

¹ Umbom patabuyaanj isov, ra Maria to Magdala yesuru Maria ite tau Yakobus tiina, ve Salome, yes tol tila tighol naunaunj tomania ngoreenj tau vaazi popoia na, tighe tighamu tila, ve tilinj izala Yesu paata.

² Tauvene saawe imin maata to wik tana, mbonoozo tau aaz ighe iza, ve yes tol tiburig gha tila pa naal to Yesu.

³ Tilaghlaagh tila, ve tivasavo zi tighe: “Sei pale iuul ghiit, ve ipatambulia maet tiina ighau pa naal aavo?”

⁴ Tila tivot, ve matazi ila le tighita maet tiina tau ipoon naal aavo na igheen ila niia muul mako. Tipatambulia ighau ila ziige wa.

⁵ Tauvene zilivaa tawe tilonj tila naal loolo, le tighita neer paaghu ee mboole izi ziige ila pa tapir. I inonogh ghi pa nonoghiinja pisosoonja. Yes tighita, le tirur ve ngar toozi imbool.

⁶ Neer tawe isaav pazi ighe: “Yam agham ngar naol sov. Yau nawatagh: Yam alam aghe aghita Yesu to Nasaret tau tiravu izala ai pambaroon na paata. Eemon i ileep ta sene muul mako. Maaron ipaburigini pa mateegh wa! Aghita niia tau tighur paata igheen ila ne.

⁷ Aloonj. Yam ala ve apaesia gabua tane vaaru pa mbiwa tooni. Ve matamim ingal Petrus, ve apaes pani paam. Asaav pazi aghe: Yesu pale imuunj ila Galilaia. Ataghoni ala, o aghita izi ta sewe itaghon saveenj tau muunj i isavia payam.”

⁸ I isavsaav pazi le isov, ra zilivaa tana tipul naal, ve tivot tila muuri, ve tighau tila toman roinj tiina. Pasaa, gabua tau ivot pazi na, igham zi tirur le ngar toozi imbool. Tauvene tisavia gabua tana vaaru pa tamtamon eta mako. *

*Maria to Magdala ighita Yesu
(Mt 28:9-10; Yo 20:11-18)*

⁹ Saawe imin maata to wik tana (Sande), mbonjoozo geeg, ve Yesu iburig pa mateegh. Ra ila ivot to Maria to Magdala imin maata. I livaa

* **16:8:** Zeran ngara katini tigde saveenj tau Markus tauu iboode na, ilam imuul ves 8 mon. Eemon murei, tiseenj vaaru poia to Markus pa saveenj siriv itaghon saveenj tau Matayu ve Lukas tiboode na. Saveenj tawe ta aazne igheen ila ziiri 9 ila imuul ziiri 20. Ve buk munganazi siriv, saveenj ziiri ite ipasov vaaru poia to Markus. Saveenj tauvene: “Zilivaa tana timuul tila, ve tipaesia saveenj isov tau anjela isavia pazi na pa Petrus tomania yes tau tileep tomania na. Murei ra, Yesu imbaan mbiwa tooni tila to tivotia saveenj patabuyaanj to Maaron pa nughmarinj. Yes tau tileep ila pa aaz iza, ve yes tau tileep ila pa aaz izila na paam. Leso tiwatagh eez to Maaron igham mulin zi, ve tileep matazi yaryaare le alok. Saveenj tooni tana irau isov ne mako. Igheen le alok.”

tau muun Yesu iziir avuvu sasaghati liim ve ru tighau pani. *

¹⁰ Maria ighita le isov, ra ila ipaes pa yes tau muun tilaghlaagh tomania Yesu na. Pasaa, yes tileep toman lolozu ipatanjan ve titanjan pani.

¹¹ I isaav pazi ighe: “Yesu, i iburig pa mateegh, ve ileep maata yaryaare. Yau naghita pa taug matag.” Eemon yes tighur ila saveen tooni mako.

Mbiwa ru tighita Yesu izi eeze
(Lu 24:13-35)

¹² Murei ra, mbiwa ru to Yesu tipul nugh tiina Yerusalem, ve tilaghlaagh taghon eez tila, ve Yesu ivot toozi. Eemon tighilaalo rekia mako. Pasaa, naagho ite rig.

¹³ Saawe tau tighilaalo, timuul tila ve tipaesia gabua tana vaaru pa mbiwa tooni siriv. Eemon saveen toozi paam, zetazja tighur ila mako.

Yesu ivot to mbiwa tooni
(Yo 20:26-31)

¹⁴ Murei ra, mbiwa tooni sanjavul ve ee tilup zi pa ghanghaniin ve tilepleep. Malau mako ve Yesu tauu ivot toozi, ve iyaon zi. Pasaa, i iburig pa mateegh, ve tamtamon siriv tighita, ve tisavia vaaru pazi wa. Eemon ngar toozi iyaryaan, ve tighur ila mako. *

Yesu ighur uraat pa mbiwa tooni
(Mt 28:18-20; Lu 24:44-49; Mbanj 1:6-8)

¹⁵ Ve Yesu isaav pazi ighe: “Ala arau nughmarin, ve avotia vaaru poia pa tamtamon tisov to taan. *

* **16:9:** Lu 8:2 * **16:14:** 1Kor 15:5+ * **16:15:** Mt 28:19; Mbanj 1:8; Kol 1:23

16 Isaav ighe tamtamon eta ighur ilam tsiau, ve igham yaa, ene aat Maaron igham mulini ve ileep poi. Eemon yes tau tighur ila mako, Maaron pale ighur atuya pazi ve tilalez. *

17 Yes tau tighur ilam tsiau, ene pale naghham lezi tapiri to tigham gabua ngeretazi tivot. Gabua tauvene: Pale tiziir avuvu sasaghati tighau ila yau ezag, ve tisavsaav ila nugh nugh alinjazi tau tiwataghi mako. *

18 Ve isaav ighe tikis moot saghati eta, ma tighun kaut lilia eta, ene aat irau ivaghamun zi mako. Ve isaav ighe tighur nimazi izala moroghoonja pavozi, ve tighason Maaron to iuul zi, i aat igham zi tinizi poia muul.” *

*Yesu imuul izala pa sambam
(Lu 24:50-53; Mbanj 1:9-11)*

19 Tiina toit Yesu isavsaav pa mbiwa tooni le isov, ra Taama Maaron ighamu imuul izala pa sambam, ve mboole izi ila i niima tapir. *

20 Ra mbiwa tooni tila tivotia vaaru poia irau nugh naol isov. Ve Tiina toit ileep tomani zi pa uraat toozi, ve igham gabua ngeretazi ivot ila nimazi. Tauta ipariaan saveen tau tivotia na, ve tamtamon tighur ila tigde saveen tana, ene saveen onoon. *

* **16:16:** Yo 3:18, 36; Mbanj 2:38; Ro 10:9 * **16:17:** Mbanj 2:6, 5:16, 8:7, 10:46; 1Kor 12:9, 28 * **16:18:** Lu 10:19; Mbanj 3:7, 28:3+; Yems 5:14+ * **16:19:** Mbo 110:1; Mbanj 2:33, 7:55; Ro 8:34; Hib 1:3
* **16:20:** Mbanj 4:29, 14:3; Hib 2:3

**Maaron Saveen Tooni Patabuyaang
The New Testament and portions of the Old Testament
in the Tuam dialect of the Saveeng language of Papua
New Guinea. The Saveeng language is also called the
Mutu language.
Sampela hap Buk Baibel long tokples Saveeng Tuam
long Niugini.**

copyright © 2011 Wycliffe Bible Translators, Inc.

Language: Saveeng (Mutu)

Dialect: Tuam

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-08-31

PDF generated using Haiola and XeLaTeX on 18 Apr 2025 from source files dated 31 Aug 2023

adb844f0-d769-5b05-9dd0-7c01fca938bb